

壽



隆平集第五卷

宋曾文定公編撰

南豐後學彭期訂

宰臣

王曾字孝先青州益都人咸平中登進士甲科所試  
有物混成賦天下以爲賦格累擢知制誥翰林學士  
大中祥符九年參知政事時王欽若方挾祥瑞迎合  
人主意陰排異已者以細故罷曾政事天禧中復參



知政事兼太子賓客仁宗卽位以爲宰相忤太后意  
罷知青州景祐二年復相封沂國公與呂夷簡議論  
不協求退出判鄆州加資政殿大學士卒年六十贈  
侍中諡文正有文集五十卷子緯幼以姪繹爲後景  
祐初契丹始修好所致書以南北朝冠國號之上曾  
時直史館言春秋外夷狄爵不過子今與抗非外夷  
狄之意上嘉之天書降詔作玉清昭應宮廷臣莫有  
言者曾陳五害以諫在翰林一日上晚坐承明殿召  
對命謁者諭之曰思卿甚故不及御朝服爲上所敬

如此知審刑院初違制之法無故失率坐徒二年曾  
請分故失非親被制書者止以失論上不悅曰如是  
無復有違制者曾曰如陛下言亦無復有失者矣自  
是違制遂分故失天禧初知應天府民訛言有妖若  
飛帽搏人自京以南皆驚恐曾夜開里門捕倡言者  
民乃定真宗晏駕丁謂欲皇太后對近臣決政事皇  
帝獨朔望見羣臣庶務悉令入內押班雷允恭畫可  
於禁中曾曰兩宮異處柄歸宦者禍端兆矣乃奏請  
如東漢舊制太后坐右垂簾同聽政焉真宗不豫有



陞平集 卷之五  
引唐漢事諷皇后稱制者。曾密語后戚錢惟演曰。今太子決政資善堂。天下固已屬望。可異議耶。惟演悟。不敢異議。丁謂坐雷允恭。改皇堂事。參知政事任中正言於上曰。謂被先帝顧託。請如律議功。曾曰。謂不忠無足議者。於是謂貶崖州。中正而下十數人。隨亦廢黜。是時中外洶洶。會正色立朝。姦邪憚焉。前後輔政十年。處天下事。審而中。理性儉素。居家人。不見其喜愠之色。入朝盛服。進止如有尺寸。士大夫服其清修。莫敢干以私者。與王旦同謚。世皆謂之賢相。

李迪字復古。濮州人。少從柳開學。爲古文。開謂門人張景高弁曰。此公輔器也。景德二年。登進士甲科。累擢知制誥。翰林學士。天禧元年。參知政事。東宮建兼太子賓客。寇準罷相。上欲相之。迪固辭。一日對資福殿。皇太子出拜。上前曰。蒙以賓客爲宰相。上顧迪曰。復何辭耶。先丁謂拜相。而以丁謂爲昭文館大學士。位迪上。帝不豫。令皇太子總軍國事。丁謂獨請皇太子止決常務。他皆聽旨。迪爭不勝。謂益擅權。至除吏。不以聞。迪語同列曰。迪起布衣。至宰相。能取容徇權。



臣耶。時詔二府竝進秩兼東宮官。乃遷迪中書侍郎兼尚書左丞。故事宰相無作左丞者。謂欲以抑迪也。又欲進所善林特樞密副使兼賓客。迪執不可。因於待漏所大詬之。至上前斥謂擅權不法事。且言寇準無罪不當黜。因格前制不下。出謂知河南府迪鄆州。謂入謝自陳無罪。復畱及仁宗卽位。貶迪衡州團練使。謂使人逼之。至自裁不死。謂竄迪稍復。及章獻皇后崩。乃再相。景祐二年。范諷以罪貶迪。坐諷姻家。出知亳州。久之除翰林侍讀學士。畱京師。奏呂夷簡結

荆王元儼爲除門僧惠清守闕。鑿義鞠之。乃迪在中書時。補降太常卿。知密州。久之復資政殿大學士。知兗州。元昊反。乃上章請臨邊除節制。判天雄軍。康定元年。請老。以太子太傅致仕。卒年七十七。贈司空。謚文定。賜御篆碑額。曰遺直之碑。子東之。徽之。輔之。初迪在翰林時。薦饑三司調用不給。上召迪問。迪對曰。祖宗置內藏庫。欲攻取西北。且備凶年。今邊無他費。以佐國用。則民不加賦。上爲大發內庫金。繪賜三司。知秦州曹瑋。數言。喚厮羅欲內寇。請益兵。不遣。乃求



罷上問誰可代之。迪曰：非瑋莫能制也。陛下重發兵，得非將上玉皇聖號耶？上因問陝西兵數。對曰：臣向在本道，以方寸小策記兵及糧，以備調發。今猶置佩囊中，上令採取之。目小黃門取紙札，迪悉上合存留。及調塞下數，上曰：不意頗收復在吾禁中矣。未幾，喃厮羅寇邊，復召問對。曰：瑋必克。後數日捷報至上，曰：卿何料之審也？曰：彼舉兵遠來，此堅壁待之，是以知其必勝。爾垂簾，日迪知河南許朝見，章獻太后謂迪曰：卿不欲吾與國事，吾今保養天子至此，如何？迪曰：

不知。太后有聖德也。后喜。

張知白，字用晦，滄州人。端拱二年登進士第，累遷龍圖閣待制、御史中丞。大中祥符九年，叅知政事。天禧二年，罷為侍讀學士。知大名府。真宗賦詩餞之。仁宗卽位，召為樞密副使。天聖三年拜相。六年薨於位。贈太傅、中書令、諡文節。無子。景德初，周伯星見，百官稱賀。知白獨以為人君當修德以應天星之見。伏何所繫焉？因極陳治道之要，又以朝廷重內官、輕外官，引唐李嶠議請選臺閣分典藩郡，仍自請補外。真宗以



知白居侍從不許及固請乃以知青州初知白叅知政事爲宰相王欽若所排及知南京欽若謫分司南京衆謂必報之而知白待之加厚其在相位清約如寒士慎重名器人服其公

呂夷簡字坦夫壽州人曾祖夔奇後唐爲工部侍郎咸平三年夷簡登進士第累擢知制誥龍圖閣直學士仁宗卽位除叅知政事天聖六年拜相明道二年罷是年復相景祐二年封申國公四年罷以使相判許州徙天雄軍未幾復相慶曆元年進封許國公判

樞密院以判院太重改兼樞密使二年以病特進司空平章軍國重事上憂之剪髭賜以療其疾夷簡薦富弼等數人可大用因再辭位進司徒固請老以太尉致仕卒年六十六贈太師中書令謚文靖賜御篆碑額曰懷忠之碑子公綽公餗公弼公著公孺始王旦嘗謂王曾曰夷簡器識遠大君其善交之後果與曾竝相夷簡通判貝州按河北水災請除田器之算以重本因詔天下農器皆除算寇準知永興軍擿巨姦徙湖南過關有上變事者夷簡曰此必有使之者



宜○勿○問○益○徙○之○遠○方○上○從○之○權○知○開○封○與○魯○宗○道○同  
按○雷○允○恭○徙○皇○堂○事○真○宗○既○耐○廟○太○后○欲○神○主○復○日  
悉○陳○其○平○生○服○玩○夷○簡○曰○太○后○奉○遺○以○保○嗣○君○非○遠  
姦○進○忠○愛○民○欽○天○未○足○爲○報○也○故○事○輔○臣○因○郊○恩○遷  
官○夷○簡○與○同○列○豫○辭○之○遂○著○爲○式○章○懿○太○后○上○仙○夷  
簡○因○奏○事○簾○前○曰○聞○夜○中○有○宮○嬪○亡○者○太○后○卽○起○有  
頃○獨○出○謂○夷○簡○曰○卿○欲○離○吾○母○子○也○夷○簡○曰○太○后○他  
日○不○欲○保○全○劉○氏○乎○太○后○悟○乃○發○喪○成○服○備○禮○葬○之  
大○內○災○宮○門○晨○未○闕○輔○臣○請○對○上○御○拱○辰○門○樓○百○官

拜○樓○下○夷○簡○獨○不○拜○上○遣○問○其○故○曰○宮○庭○有○變○願○一  
見○上○上○爲○舉○簾○見○之○章○獻○皇○后○崩○夷○簡○手○疏○請○正○朝  
綱○塞○邪○徑○禁○貨○賂○辨○佞○士○絕○女○謁○遠○近○悉○罷○力○役○節  
宄○費○既○又○立○州○郡○學○校○授○宗○室○環○衛○官○建○睦○親○宅○增  
教○授○官○置○大○宗○正○以○總○之○郭○后○廢○上○欲○立○民○閒○女○陳  
氏○爲○后○夷○簡○力○止○之○慶○曆○初○契○丹○兵○壓○境○夷○簡○請○建  
都○太○名○示○親○征○之○意○曰○此○囊○瓦○城○郢○計○也○於○是○建○北  
京○天○聖○初○太○后○臨○朝○內○外○無○閒○言○夷○簡○之○力○爲○多○議  
者○以○其○再○相○增○北○虜○歲○賜○授○宗○室○環○衛○官○非○計○之○得



也。張士遜字順之，光化軍人生，百日始能啼。淳化中登進士第，屢從外補，當貢舉初，用糊名法。士遜試諸科，爲巡捕白主司，有親戚在進士中，願引避，不聽。因自言真宗是之，遂詔自今舉人與試官有親嫌者，皆移試別頭。後中書擬進江南轉運使闕，帝自除士遜，大中祥符初，詔天下州郡置天慶觀，士遜請因諸舊觀，以省營造，詔如其請。久之，選爲壽春郡王友及儲宮建遷諫議大夫，兼右庶子，又遷賓客。天禧五年，樞密

副使。天聖六年，拜相。明年，罷。明道元年，復相。次年，罷。寶元元年，復相。封鄧國公。七上章請老，進鄧國公優拜太傅，致仕。以宰相謝事前，此所未有也。就第十年，方卒。年八十六。贈太師，中書令，謚文懿，賜御篆神道碑。額曰：舊德之碑。上欲臨奠，左右言其日庚戌，本命也。上曰：朕以師臣，夫復何避？士遜七歲喪母，養於其姑姑。亡，徒跣扶柩，特追封南安郡太君。陳堯佐罷，叅知政事，有挾怨，上言堯佐欲反，復有誣諫官陰附宗室者。士遜置二奏上前，且言儉言動，搖朝廷若一開。



姦萌則臣亦不能自保矣。上悟置告者於法。誣諫官事亦寢。在相位曹利用憑寵自恣而不能正時。諂以爲和。鼓惡程琳參知政事多異議。孔道輔御史中丞不附已。欲併逐之。鄭戩發琳市第事。士遜諷道輔使營釋之。道輔不知其賣已。遂言於上。上疑以朋黨。琳及道輔俱被黜。道輔憤惋而死。楊偕嘗彈士遜納女口於宮中事。所著春坊弊箒等十集。子友直友侗友正。

王隨字子正。河南人。咸平五年登進士第。累擢知制

誥。仁宗爲皇太子。選任右庶子。坐假周懷政白金。落知制誥。改給事中。知杭州。乾興初復降爲祕書少監。知通州。久之復給事中。遷龍圖閣直學士。知戎州。戎人多畜逃卒。或忤意則執以求賞。故坐法衆。隨至下令能自歸者免。仍隸舊籍。多所全活。擢御史中丞。明道二年參知政事。景祐二年知樞密院事。四年與陳堯佐動輒忿爭。無大臣體。以災異援東漢策免。例同請罷除節制。判河陽。卒。年六十七。贈中書令。諡章惠。子鑑。錯。錡。初隨除京西轉運使。言父母在洛中。乃所



部真宗賜詩及羊酒束帶帛使過家爲壽時人榮之。在西掖不善爲制命故出知應天府外若方嚴而所治常失於寬善佛慕唐裴休爲人仍學其書世謂弗逮也。

陳堯佐字希元閩州人父省華國史有傳兄堯叟字唐夫端拱二年登進士甲科太宗常詢其父省華猶在常調遂召用之。明年父子同日賜緋堯叟累擢樞密直學士咸平四年同知樞密院事丁父憂起復景德元年改簽書三年知院事大中祥符五年加平章

事樞密使兼羣牧使七年罷八年復舊官職九年以疾出爲右僕射知河陽疾甚求還至京卒年五十七。贈侍中諡文忠有文集三十卷堯叟有材略多智術久典機密軍馬之籍皆能記之究心羣牧馬政多立條約公私以爲便常爲廣西轉運使其俗有疾不服藥唯禱神堯叟以集驗方刻石桂州驛舍是後始有服藥者嶺外少林木井泉堯叟爲植木道傍鑿井置亭舍至今爲利性儉素事親至孝母馮性嚴堯叟未嘗忤其意

原本略作用



堯佐端拱元年登進士第累擢知制誥翰林學士天聖七年樞密副使改叅知政事明道二年罷景祐四年與王隨同相次年諫官論政事錯謬以宰相非其人遂與王隨同請罷竝除使相堯佐判定州康定元年以太子太師致仕居鄭州四年卒贈司空兼侍中諡文惠後事皆豫備自誌其墓曰有宋潁川生堯佐字希元號知餘子壽年八十二不爲天官一品不爲賤使相納祿不爲辱三者粗可歸息於父母棲神之域矣有文集三十卷又有潮陽編野廬編遣興策愚

丘集子述古求古學古道古博古修古履古游古襲古象古初堯佐爲開封府推官以言事貶通判潮州潮俗鄙陋始至爲修宣聖廟作韓吏部祠堂人始知學有張氏子年十六爲其母浣衣惡溪爲鱷魚所噬堯佐募韓吏部投文惡溪因捕獲以文戮之於市爲兩浙轉運副使杭州江堤舊以竹籠石潮濤所嚙未幾輒壞堯佐議實薪土以易之或言其不可而丁謂執政遂徙堯佐京西其後堤久不成遂用薪土知滑州河決捲埽不能定堯佐乃鑿木如編齒置於湍流



隨水而下。謂之木龍。遂殺水勢而堤。又護以長堤。郡人謂之陳公堤。在樞府。日太常博士陳詒。知祥符縣。以法繩吏。吏悉遁去。章獻太后怒。事下樞密院。詒連姻宰相呂夷簡。有欲因詒中傷夷簡者。堯佐以為罪。詒則姦人得計。而能吏沮矣。詒遂獲免。堯佐工為二韻詩。人多傳之。性儉約。不事浮侈。當未第時。同父省華及伯季訪華山陳搏。搏謂之曰。三子皆將相。然中子伯季所不逮也。卒如其言。

原本墓誌首端作掃

弟堯咨。字嘉謨。咸平三年登進士甲科。累擢知制誥。

景德三年。殿試進士。與劉幾道於試卷中為密號。貶鄆州團練副使。大中祥符九年。復知制誥。遷集賢院。又遷龍圖閣直學士。知永興軍。所為多不法。上不欲窮治。止罷學士。徙鄧州。復知制誥。常為人所傾。堯叟乞示以所犯。使知上保全之意。因詔切責之。乃引謝。久之。復職。仁宗即位。擢知開封府。除翰林學士。龍圖學士。換觀察使。知天雄軍。固辭。不得已。受之。加畱後。進武信軍節度使。再知天雄軍。卒。年六十五。贈太尉。諡康肅。子敏古。宗古。昭古。榮古。垂古。本古。臻古。堯咨。



有文著治本十六篇。諸宮上下編善射。性豪侈。在永興置武庫。建視草堂。開三門。築甬道。出入用刑。慘刻。數陵陝西。轉運使樂黃目。黃目請徙以避之。其事遂達於上。

章得象字希言。世居泉州。高祖任僞閩建州刺史。因家浦城。母夢登天得玉象。而得象生。旣生。父夢庭中積象笏如山。因名之曰得象。咸平五年登進士第。累擢知制誥。翰林學士。加承旨。景祐三年同知樞密院事。寶元元年與張士遜同相。慶曆五年以使相判陳

州。封鄒國公。徙河南府。引疾守司空致仕。卒年七十一。贈太尉。兼侍中。諡文憲。性簡重。翰林十二年。怡然自得。居相位八年。親戚子弟皆抑而不進。子澤之。介之。廷之。脩之。仁宗常謂得象曰。先太后臨朝。羣臣邪正。朕皆默識之。卿獨忠清。無所附麗。故大用也。

陳執中字昭譽。父恕。字仲言。洪州人。少爲小吏。俄折節讀書。王明知洪州。褐衣請見。劇談時務。明歎曰。奇士也。太平興國初。登進士第。擢至給事中。淳化二年。叅知政事。坐以上意語樊知古。辨析上前。因罷政。自



後屢遷至尚書左丞集賢院學士景祐元年卒年五十九子淳執中執古恕長於吏事在朝敢言端拱初爲河北營田制置使密奏曰戍卒皆惰游仰食縣官一旦使冬被甲兵春執耒耜恐變生不測旣得詔罷營田止葺堡壁而已屢司金穀檢察甚峻常言出入之任所當慎者起支定例人以為當時在三司頗傷苛碎知貢舉避嫌凡江南貢士皆被黜落又舉行貢舉非其人條被罪者皆怨憤恕事親至孝居喪絕葷茹哀毀過禮以故得疾不任治劇執中以父任爲正

字屢進文論真宗稱善名至闕下帝屬疾大臣無敢及建儲執中上言太子天下本不可不早定明日上袖所製演要三篇示大臣徐曰更有一佳文字乃所陳建儲議因召見擢右正言坐公累奪正言出監岳永真三州酒稅茶務累擢天章閣待制龍圖閣直學士寶元元年知樞密院康定元年罷慶曆四年參知政事五年與賈昌朝同相皇祐初以疾求罷進吏部尚書觀文殿學士知陳州久之以使相判大名府五年復相以答小婢出外舍死御史孫抃列其八事劾



奏之翰林學士歐陽修亦論列於朝至和二年罷除使相判亳州還上節鉞改右僕射封黃國公徙河南曹州過京以疾賜告就第加司徒祁國公致仕卒年七十贈太師兼侍中有司謚恭襄詔謚曰恭執中當國八年人莫干以私四方問遺無及門者在中書不欲外聞差除每退朝卽閉省東門又罷三司百司句當公事及三司所舉場務官皇祐末貴妃薨上常詢之不能考正典禮以對遂至追黜再論罪之晏殊字同叔撫州臨川人七歲善爲文景德初李昉

張知白安撫江南薦之召試詩賦進士出身後二日復試詩賦論自言賦題已常爲之上喜其不欺爲改題文成稱旨擢正字祕閣讀書丁父母憂皆特起復仁宗封昇王爲記室升儲爲太子舍人累擢知制誥翰林學士天聖三年樞密副使五年罷旣而除御史中丞改資政殿學士兼翰林侍讀學士除三司使復樞密副使未拜改叅知政事章獻太后崩以禮部尚書罷知亳州陳州復爲御史中丞三司使康定初知樞密院事未幾除樞密使慶曆二年加平章事三年



與章得象同相四年諫官孫甫蔡襄彈奏所撰李宸妃墓銘不言上宸妃所生及役兵治產事除工部尚書知潁州應天府許州復觀文殿學士知永興軍河南府以疾請歸京訪醫畱侍經筵提舉萬壽觀卒年六十五贈司空兼侍中諡元憲真宗常謂輔臣曰殊少年孤立力學自奮加以沉謹京師賜酺京官不預會同輩召出觀不答其弟穎亦能屬文朕遣取所業且戒殊勿爲改竄弟請潤色不之省亦不言其故周慎如此信知其稟賦異也在三司時元昊叛陝西用

兵殊請罷監兵仍不以陣圖授諸將及募教弓箭手又請出宮中無用之物以佐邊費由是悉罷他日之領財利者還度支初爲樞密副使從幸玉清昭應宮怒從者笏後至擊折其齒緣是遂出性剛峻簡率如此雖少富貴奉養若寒士當世賢士大夫如范仲淹歐陽修孔道輔輩皆出其門其爲文章瞻麗應用無窮尤工風雅才有餘思子居厚成裕知止明遠祇德幾道傳正女適富弼楊察有文集二百四十卷又有臨川集二州集二府集又取梁陳至唐人文章



為一集既葬御篆其神道碑云劉云王介甫不得專臨川矣

杜衍字世昌越州人大中祥符元年登進士第累擢

天章閣待制樞密直學士御史中丞龍圖閣學士康

定元年同知樞密院事改副使出為河東宣撫使慶

曆三年樞密使四年拜相兼樞密使五年罷明年願

還印綬以太子少師致仕故相一上章服以三少致

仕非故事議者以為賈昌朝疾之故也謝事十餘年

累遷至太子太師祁國公卒年八十贈司徒兼侍中

謚文獻子訢衍臨終作遺疏千餘言其略云勿以久

安忽邊防之戒勿以既富輕國用之原又請早建儲

副以安天下心衍清介舊無居第既退方葺舍南都

出入如平日無軒冕意好吟詩晚喜草書在相位多

裁抑僥倖衆所不悅御史劾奏其壻蘇舜欽集妓樂

進奏院祠神事又王益柔作傲歌語涉指斥欲下御

史按罪衍謂羅織獄今起都下矣執不可又諫官孫

甫言丁度面求進用請屬吏衍不為致對范仲淹富

弼出宣撫言者隨攻之上欲罷二人衍又以為不可

遂疑其朋黨出知兗州范仲淹常出行門下後數爭



事上前。衍無愠色。仲淹益敬服焉。出補門下封。建  
龐籍字醇之。單州人。大中祥符八年登進士第。累擢  
天章閣待制。龍圖閣直學士。慶曆四年。樞密副使。皇  
祐三年。拜相。五年。罷。以使相觀文殿學士知并州。徙  
青州。請老。以太子太保致仕。卒。年七十六。贈司空兼  
侍中。諡莊敏。子元英。元中。元直。初籍爲大理寺丞。預  
編天聖敕。累擢殿中侍御史。章獻太后崩。籍下閣門。  
取垂簾儀制。盡燔之。有欲造後苑珠玉奇巧物媚上  
者。籍言。螟蠱爲災。民憂轉徙。復有西北夷狄之患。苟

非儉約。何以濟用。上嘉納之。爲開封府判官。尚美人  
遣內侍韓從禮稱教旨。免工人市籍者。籍言於上。上  
爲杖從禮。仍詔諸司。自今宮中傳命。無得施行。知延  
州。自五龍川之敗。戎落民居焚燬幾盡。戍兵十餘萬。  
未有營壁。籍按金明西北有渾州。水土平沃。川尾有  
橋子谷。卽虜出入之隘道也。命鈐轄狄青將萬人築  
招安寨於谷旁。募民耕墾。得粟甚多。凡故地爲虜所  
據者。悉逐之。築土城。久之。元昊遣牙校齎其親信野  
利旺榮書求納款。籍意其詐。不受。後數日果寇定川。



既而復以旺榮書來而元昊亦去僭號籍不敢答乃請於朝朝廷厭兵議招懷之使籍答書稱旺榮為太尉籍復請曰太尉天子三公使旺榮稱之則元昊不可得臣矣其書自稱寧令或謨寧令皆虜中官於義無嫌詔從之踰年又遣使來改名曰曩宵稱男不稱臣籍言名體未正不敢以聞其使求自至京師若天子不許則更歸議之籍言虜辭理浸順俟其使至仍遣使同往申諭之卒用其策而元昊復臣及為樞密副使又請併省官屬徙兵就食於是邊費十省七八

其後又與中書議汰冗兵八萬焉在相日儂智高叛或言狄青不可專任上以問籍籍曰青起行伍若以文臣聞之則號令不專不如不遣也上然之及捷書至上謂籍曰非卿執議豈得成功既而推恩二廣應舉者六百九十一人時以為僭嘉祐中皇嗣未建上不豫籍密疏言之甚切

劉沆字冲之吉州永新人父素不仕以財雄鄉里曾祖景洪事楊行密為江南牙將有彭玕者據州稱太保脅景洪附湖南偽許之復以州歸行密遂不仕常

言希言福  
建人王定  
國臨江人  
晏同叔臨  
川人劉冲  
之吉安人



皆先介甫  
為相洛陽  
橋上杜鵑  
之讖恐後  
人附會邵  
康節耳

謂人曰。我不從彭玕。當活萬餘人。後必有隆者。因名所居山曰後隆山。山有唐牛僧儒讀書堂。故基即其上。築臺曰聰明臺。沈母夢牛相公來而生沈。天聖八年登進士第。累擢知制誥。龍圖閣學士。皇祐三年。參知政事。至和元年。拜相。嘉祐元年。罷。知南京。徙知陳州。卒年六十六。仁宗作挽詩。賜其家。又篆其碑額曰。思賢之碑。沈倜儻任氣。所至有治聲。決訟多中理。時論比之張詠。知衡州。有大姓尹氏為偽券以欺鄰人之孤。訟久不得直。沈至。其孤纔二十。詰尹氏曰。若券

會取證他鄰否。其人當有存者。尹氏辭。服刑而歸。其田。知潭州。有草寇黃捉鬼。鄧和尚。誘溪峒獠人擾湖湘。北軍至。多病死。沈募土兵。使保地。分賊稍困。乃令提點刑獄楊畋等。八路入討。斬首萬餘級。遂頓兵。開一路。榜曰。賊由此路出。降敢殺者。與擅殺同。於是降者三四萬人。賊平。召還。而餘黨復叛。殺裨將。降知鄂州。其後權知開封府。有張彥方。受富民金。偽為張貴妃母。越國太夫人。奏補助教。敕沈抵彥方死。不問越國及叅知政事。包拯論沈緣貴妃進。後追冊貴妃。



爲后而沆爲園陵使既葬賜妃閣金器百兩辭不受。在相位疾言者屢加裁抑又舉行御史遷次之格滿二歲者與知州范師道趙抃歲滿求郡獨引敕出之中丞張昇等言沆挾私出御史沆乃言臺官將有不測之謀論辨不已遂罷知南京子瑾琢瑄賈昌朝字子明真定人晉中書舍人緯之曾孫天禧元年獻頌召試賜同進士出身景祐元年初置崇政殿說書以授昌朝而天章閣置侍讀亦自昌朝始累擢知制誥龍圖閣直學士權知開封府御史中丞慶

曆三年參知政事四年樞密使五年拜相七年除使相判大名府王則平加檢校太師封安國公楊偕言賊發所部不當賞弗聽皇祐元年徙鄭州畱以觀文殿大學士判都省又求補外除右僕射使侍中判鄭州辭僕射侍中改使相二年母喪去位四年除故官召對經筵講易出判許州移大名嘉祐元年樞密使仍同平章事三年諫官御史言昌朝別爲客位以待宦官又釋其矯制者罪雖無實罷爲使侍中景靈宮使七年復判大名府英宗卽位加左僕射鳳翔尹魏



國公治平元年求還使侍中不許二年改觀文殿大學士判都省卒年六十八諡文元昌朝在經筵善講說仁宗有所質問皆記錄刪潤以進賜名邇英延議二閣記注錄太平興國寺災以易春秋進戒因言可勿繕治以稱順天愛人之意西域僧以佛骨銅像獻請加賜遣還勿示外皆從之銓法縣令俸錢滿百二十千者乃注舉縣令人昌朝判銓以為如此則小縣終不得善令矣仍一等給俸劉平石元孫陷西虜或誣以降議收其族昌朝為中丞言事未可知乃不果

收及在相位元孫自西夏歸議賜死昌朝獨曰自古將帥被執歸不死元孫得不死侍講林瑀以天子即位年月傳會易算推吉凶昌朝疏出之元昊反昌朝請減不急費詔令與三司合議歲<sup>減</sup>百萬緡又言待夷狄六事時皆用之在大名河決商胡中書議歸之六塔昌朝力爭之不已其後河果不可塞振救瀕河水災之民全活甚衆中人劉恢往還河上言河決趙征村與上姓名嫌為不祥或謂昌朝使之以搖當國者昌朝博學善議論為一代名臣及大用不為正人所



與而數有攻其結宮人宦官者有奏議文集各二十卷通紀八十卷本朝時令十二卷羣經音辨十卷宋庠字公序安州人舉進士開封禮部皆第一人天聖元年賜進士及第與弟同有時名以詩賦爲學者所宗謂之二宋庠初名郊李淑因對言於上曰郊交也淑稱博學此說何其鄙陋姓與國號同而名交非所宜仁宗語之更焉累擢知制誥翰林學士寶元二年參知政事出知揚州加資政殿學士慶曆五年復參知政事八年樞密使皇祐元年與文彥博同相二年罷爲觀文殿學士知河

南府徙許州河陽嘉祐三年同平章事樞密使封莒國公五年罷以使相判鄭州徙相州英宗卽位移鎮加檢校太師鄭國公景靈宮使屢請老不許出判亳州其請不已乃以司空致仕卒年七十謚元憲上篆其碑額曰忠規德範之碑初制舉人與武舉雜試庠建言六科待天下異士宜設次具酒食禮之武舉人別試上從其請慶曆中仁宗召兩府資政殿親策以時事庠獨以爲兩漢對策本延崑穴草萊之人臣等備位大臣自視遇如賤士非所以尊朝廷乃請歸中



書合議上奏從之。後又手詔以時事詢兩府與庠。同推庠爲對。庠所至以靜鎮爲治。末年信愛幼子。頗致物議。性儉約。不喜聲色。讀書至老不倦。初在西掖上。欲以同知樞密院故事。無自知制誥除者。乃名入翰林。而用弟祁。祁字子京。與兄庠同試吏部。會諒陰。止奏名。祁爲第一章。獻太后云。弟不可先。其兄可擢庠第一。而祁爲第十人。兄弟友愛甚篤。仍同簽甲科。初釋褐。授復州軍事推官。累擢。修起居注。次當知制誥。而庠叅知政

事。乃除天章閣待制。庠罷除知制誥。歷龍圖閣直學士。翰林學士。庠復執政。改龍圖閣直學士。樞密使。復翰林學士。當張貴妃制。祁欲以告。進問李淑。淑曰。弟進之上。意在冊禮。祁乃進告。遂落職。知許州。未數日。復侍讀學士。又復龍圖閣學士。御史言其子與張彥方游。出知亳州。徙成德軍。加端明殿學士。吏部侍郎。知益州。代還。除三司使。中丞。包拯言祁在益州多遊燕。又其兄在政府。乃以龍圖閣學士知鄭州。唐書成。進工部尚書。踰日爲翰林學士。承旨。除羣牧使。卒。年



六十四。贈刑部尚書。將終。親草遺表。勸立皇嗣。戒其子。勿請諡。勿乞遺恩。勿為銘誌。勿修佛事。子定國。彥國。惠國。輔國。奉國。順國。亮國。保國。俊國。廣國。有文集一百卷。廣樂記六十五卷。唐書列傳一百五十卷。修唐書十餘年。雖外官。亦以藁自隨。非特文章有見於世。其守邊議兵。雖古之名將。不能過也。章疏之達於上者。尤切世務。卒不至大用。時論惜之。

原案官美簡重本上無以字陸詒時歐文晏碑子八人與此不同

夏殊成裕下有知止字無宣禮崇讓字查

止

隆平集第六卷

宋曾文定公編撰

南豐後學彭期訂

叅知政事

劉熙古字義淳。睢陽人。唐僕射仁軌十一代孫。少通經史。避祖諱。不應進士舉。後唐長興中。以三傳賜第。太祖領宋州節制。熙古為節度判官。及受禪。累擢至叅知政事。求退。授戶部尚書。致仕。卒年七十四。熙古



好學明陰陽象緯書雖通顯自奉養若寒素有歷代紀要五十卷行於世子蒙叟

竇偁字日章其先漁陽人父禹鈞在周爲諫議大夫避亂徙居河南禹鈞五子儀儼偁偁皆有文學中進士第馮道嘗贈詩曰燕山竇十郎教子以義方靈椿一樹老丹桂五枝芳世多誦之儀字可象晉天福中登進士第在周爲翰林及端明殿學士建隆初授禮部尚書翰林學士時御史臺議欲以左右僕射爲表首太常禮院東宮三師合爲表首儀援典故以僕

射合爲表首者六而謂三師無所據朝廷以儀之議爲定五代喪亂之間儀儼乃以文章學問自見於一時所謂豪傑之士也儼字望之建隆初終於禮部侍郎翰林學士儼博物洽聞通音律曆數宋興禮樂皆所裁定周世宗觀大水泗州記以問儼儼以爲天地有五德曰潤曰暎曰生曰成曰動五德陰陽之使陰陽水火之本陰陽有常數水火有常分奇耦相半盈虛有準謂之通正有譌羨備過皇極無不至謂之咎證陰之始主於淵獻水之行紀於九六凡千七百二十有



八歲爲浩浩之會。雖堯舜在上，不能免者，數也。若夫辟狂臣專，又昏不明，苦雨數至，不潤下，乃政之所致。非數也。唐正元壬申之水，是以德宗闇蔽，篤於自疲。陸贄盡忠而斥遠，裴延齡專利而信用，常雨之應。夫豈虛生。傅周廣順初，登進士第，其後同與賈琰在開封府晉王席下。一日，晉王燕射，傅琰同預，而琰贊美稱。傅叱之曰：賈氏子導諛，豈不自媿坐客，皆失色。王亦不樂，因罷燕。尋白太祖出之。太平興國四年，駕幸魏郡，召傅至行在。上方議北征，傅抗疏極諫而

止。遂除樞密直學士。七年，參知政事，入謝。上曰：汝何由至此。傅曰：陛下不忘藩邸之舊，爾上曰：乃賞汝面折賈琰也。未幾薨於位。時明日燕羣臣，以傅喪故罷。李穆字孟雍，開封人，與弟肅皆中進士第，累擢知制誥，中書舍人，翰林學士。太平興國八年，參知政事。雍熙元年，薨於位，年五十七。贈工部尚書。太祖曰：非斯人不幸，乃朕之不幸也。穆端謹，自持言行，無玷。文學操履，爲上所知。太祖嘗遣使江南，諭朝旨，煜辭以疾。穆曰：朝與否，惟自處之。朝廷繁富，兵甲精銳，恐不易。



當爾太祖謂其所論要切。太平興國七年。盧多遜竄朱崖。穆以同門生。罷制誥。責司封員外郎。明年殿試。預考較。上見其容貌。謂曰。憂畏所致耶。穆流涕。上爲之動容。詔盡復舊官。命知開封府。豪右屏迹。權幸不敢干以私。是冬。遂大用上。稱曰。名臣也。弟肅。字恭叔。仕至左衛上將軍。時以爲有知人之鑒。

新編作字季雍

賈黃中。字媧。民滄州人。唐相耽四世孫。漢乾祐初年。六歲中神童。選十六進士甲科。建隆間。判太常禮院。累擢知制誥。翰林學士。淳化二年。叅知政事。四年。罷。

除禮部侍郎兼祕書監。卒年五十六。贈禮部尚書。上因念翰林無良醫。詔天下并大臣各薦能醫者。黃中嘗在翰林。召詢時政。對曰。職當書詔。思不出位。上益

重其周慎。知京朝官考課。銓量平允。掌吏部選品藻。精當。揀拔寒俊。號爲無私。性端重。守家法。多知臺閣故事。朝廷典禮。資以損益。當時知名士皆出其門。談論。亶亶聽者忘倦。特常憂畏。而執政循嘿。時論少之。太宗嘗召見其母。因謂侍臣曰。朕念黃中終日憂畏。必先其母老矣。及黃中卒。母果猶無恙。賜白金。仍官。



其三子。王沔字楚望，齊州人。太平興國二年登進士第八年，簽書樞密院。雍熙三年改副使。端拱元年參知政事。淳化元年罷，卒。贈工部尚書。沔辯慧苛刻，尚數多詐。視士大夫猶視吏卒，惟以甘言悅人而進退皆非物望。初與張齊賢同在樞府，不協。及齊賢同參知政事，頗不自安。因王禹偁請中書本廳不得接見賓客，許於政事堂同見。沔喜，即奏行謝泌疏，駁而止。上知沔意，因切責罷之。沔冒貨，雖親舊未嘗毫末相及。唯聲

音清暢，上親試舉人，多命近臣讀之，所讀常得八九。蘇易簡字太簡，梓州人。父協，仕至光祿寺丞。易簡弱冠舉進士甲科，累擢知制誥、翰林學士。加承旨。淳化四年參知政事，與張洎不協。為洎所攻。至道元年張洎進而易簡罷，未幾卒。年三十九。贈禮部尚書。易簡警悟，初屬文未工。及掌誥命，能自刻勵。在翰林多振舉故事。太宗為飛白書院額曰玉堂，及以詩賜以御書。宋玉大言賦，易簡因擬賦以獻曰：皇帝以白龍牋書大言賦，賜玉堂詞臣易簡。御筆煌煌，雄辭洋洋。瓌



瑋博達不可備詳。詔易簡陛殿躬指其理。且歎宋王之奇怪也。因伏而奏曰。恨宋玉不得與陛下同時。帝曰。噫。何代無人焉。卿爲朕繼之。易簡拜手稽首曰。聖人與兮。告成功。登崑崙兮。展升中。地爲席兮。饗祖宗。天作籟兮。調笙鏞。日烏月兔。耀文明也。參旗井鉞。嚴武衛也。執北斗兮。奠玄酒也。削西華兮。爲石礮也。飛雲涌。震騰爇。燔也。剝鵬脂。鯨代牲魚也。迅雷三發。山神呼也。流電三激。燿火舉也。禮再獻兮。淳風還。君百拜兮。三神歡。四時一周兮。萬八千年。泰山融兮。滄海

乾圓蓋穴兮。方輿穿。君王壽兮。無窮焉。時殿上皆呼萬歲。太宗覽而嘉之。賜手詔褒寵。易簡嗜酒。上嘗以詩戒之。入直雖不敢飲。在私第未嘗不醉。子耆仕至直集賢院。耆子舜欽。

舜欽字子美。以父耆任太廟齋郎。景祐元年登進士第。因范仲淹薦。除集賢校理。監進奏院。用故紙錢祠神。召妓樂會賓客。除名。後二年得湖州長史。卒。年四十一。子泌。液。激。初杜衍愛其才。以女妻之。衍在相位。以直道自任。言者因舜欽連及衍。故衍遂罷政事。舜欽



慷慨有大志，好學工文章。廢居蘇州，買水石作滄浪亭。時見其志於歌詩，又善書，酣醉落筆，人競收以爲寶。當時偉人如歐陽修輩皆相友善，亦數嘗上書論時事。

原本連作從

張洎，滁陽人。李景開貢，登進士第。景徙豫章，留洎掌李煜記室，累擢至清輝殿學士。叅預機密，煜歸朝，太祖責之曰：「汝教李煜不降，又草蠟丸詔召上江救兵。」洎對曰：「臣所爲也，大各吠非其主。」此特其一爾。詞色不動，釋之，授太子中允。太宗卽位，頗知其江表讒毀。

善良潘佑之死，與有力焉。待詔尹熙古因對以爲煜怒，佑諫太直，非洎譖也。始進擢，歷中書舍人、翰林學士，與蘇易簡同在北扉。易簡被遇，獨厚，仍先大用。洎惡之力，排易簡，遂代叅知政事。至道三年，以疾求解職，爲刑部侍郎，捧詔嗚咽十餘日。卒年六十四，贈本曹尚書。洎舊字師黯，煜令改爲偕，仁玉師圍金陵，與樞密使陳喬引符命勸勿降，又云：「苟有不虞，當先死。」社稷及城陷，喬獨死焉。洎語煜曰：「所以不死，將有報也。」煜歸朝，貧甚，洎猶丐索之，而怒其所與之薄。煜子



仲瑀死亦不弔始諂事寇準準力推挽至大用及上眷準稍衰乃面奏準退有誹謗準不辨遂罷機務止有所著述必爲文解釋其旨以苟悅言不與當世辛仲甫字之翰汾州人初從郭崇辟建隆初爲右補闕累擢至給事中雍熙三年參知政事淳化二年罷以太子少保致仕遷少傅卒贈太子太保子若冲若愚仲甫器局沈厚數按詔獄多伸雪非辜嘗知彭州課種柳蔭行路郡人謂之補闕柳奉使契丹虜主問党進何如人仲甫曰國家異人開出党進何足道也

知益州政尚寬簡民有去思及大用自守而已

李至字言幾真定人初爲內臣李知審養子太平興國初登進士第甲科累擢知制誥翰林學士太平興國八年參知政事以目疾五表罷不許雍熙三年以禮部侍郎罷疾愈令復舊任懇辭遷吏部祕書監真宗升儲爲左丞與李沆並兼太子賓客卽位並參知政事踰年除武勝軍節度使判西京卒年五十五贈侍中子惟允惟則初至執政太宗於禁中造閣藏四庫書數萬卷御書飛白題額製贊親書刻石召近臣



縱觀駕臨幸。至因薦潘慎修、舒雅、杜鎬、吳淑入充直館校理。又請購逸書，命羣官校正。時賜上尊酒，大官珍膳，令召館閣燕集，賜詩，閒奉新書奏御，必便坐延見。恩顧甚厚。久之，兼判國子監。又薦杜鎬、崔偓佺輩充職西面，請直講孫奭，重按五經，孜孜忘倦。或謂至既貴，盡逐知審養子，而取其所積，似與其辭位不受俸之行相反。是豈或然。

孫奭字宗古，卽疏孟子者。

李昌齡字天錫，應天府人。太平興國二年登進士第，累擢樞密直學士、御史中丞。至道二年，叅知政事，真

宗卽位爲戶部侍郎，坐交結中人貶許州行軍司馬。昌齡嘗知廣州，無廉譽，及起廢，御史屢彈其宿負，除知梓州，改河陽，又改光州，以祕書監致仕。卒年六十二。子虞卿。

趙昌言字仲謨，汾州人。太平興國二年登進士第。雍熙三年，知天雄軍。曹彬岐溝之敗，昌言請誅之，詔褒答，除御史中丞，駕幸金明池，名與焉。時河北用兵，樞密副使張宏循嘿，卽除昌言諫議大夫、樞密副使。以宏代爲中丞，坐胡旦翟馬周事，責久之。淳化四年，叅



知政事蜀王小波李順之亂命昌言爲招安使既行  
或言其無嗣鼻折山根恐握兵難制卽詔知鳳翔府  
蜀平改戶部侍郎罷政事咸平三年復爲御史中丞  
坐獄失實又貶旣而起知鄂孟天雄河南真定從封  
泰山卒年六十五贈吏部尚書子慶嗣凡三蒞天雄  
初豪家有峙芻茭者時誘姦人穴隄昌言廉知一日  
隄吏告急亟取豪家所積給用自是遂絕其弊淳化  
中京城大水請出廐馬外牧或云以馬備胡不可闕  
昌言謂塞下積水胡必不至從之果如所料嘗薦李

沆有公輔之量又以女妻王旦二人皆賢相也昌言  
臨事果斷無所顧避雖屢擯斥不少抑損惟對僚吏  
倨慢時論少之

王化基字永圖真定人太平興國二年登進士第累  
遷至左拾遺抗疏自薦太宗曰化基自結人主誠可  
賞也召試知制誥明年除御史中丞嘗夢物一奩啓  
皆小栢樹俄有是命上澄清略十事知樞密院柴禹  
錫僕受人金叅知政事陳恕諭令及禹錫而禹錫實  
不知一日引囚詣便殿上頗怒化基降殿令囚袒以



見其箠掠且遍曰豈有受此而隱情不言太宗益以爲長者久之出知杭州至道三年叅知政事咸平四年罷守工部尚書進禮部卒年六十七贈左僕射化基不蔭補子弟其子舉正舉元皆進士及第善筆札有文集三十卷嘗作南行詩百韻好事者多傳誦之知杭州書記張賀頗傲忽之太宗知而面詢化基第薦其才語不及它居官俸多施及親舊

王舉正字伯中幼重厚嗜學寡言化基以爲類已尤器愛之以化基遺恩補授校書郎大中祥符八年登

進士第仁宗卽位累擢知制誥妻父陳堯佐爲相換龍圖閣待制堯佐罷復知制誥又爲翰林學士康定三年叅知政事御史臺舉其女壻李徽之爲御史舉正以親嫌格不行徽之訟舉正內不能制其悍妻不可以謀國事慶曆三年罷爲資政殿學士知許州皇祐元年除御史中丞遷觀文殿學士禮部尚書兼翰林侍讀學士在經筵二年以太子太傅致仕卒年七十贈太子太保謚文簡有文集三十卷中書制書集十卷子誨說初舉正除執政入謝上曰卿未嘗干朝



延以私故不次用卿。時陝西用兵，呂夷簡以宰相判樞密院，舉正曰：「判名太重，不可不避也。」乃改兼樞密使。張堯佐授淮康軍節度使、宣徽使、羣牧使、景靈宮使。舉正任中執法，言堯佐庸人緣妃家，一日領四使。賢士大夫無所勸，不報。因退朝，留百官班廷議。上聞而遣中使諭止之，尋罷堯佐。宣徽、景靈二使居半年，復除。宣徽使舉正家居，七上疏論之。又言河北朝廷之根本，雄州、河北之喉咽，先朝用何承矩，累年止遷刺史。李元則幾二十年，亦不過引進使。今使用未盡。

得人而尅日待遷，何以懋有功者？又言在許州、應天府六年，更轉運使十六人，數易如此，豈能究宣朝廷惠澤乎？除狄青樞密使，力爭不能奪，固請解言職。上稱其風憲之體，賜白金三百兩。侍讀每及前代治亂之際，必再三以達諷諭之意。

原本中執上脫任字

郭贇字仲儀，開封人，應進士，爲開封首薦。太宗任京尹，得侍讀。藩邸卽位，擢著作佐郎。七年，四遷至叅知政事。太平興國八年，晨朝被酒，責授祕書少監。稍復積，至禮部尚書。卒年七十六，贈左僕射。贇長者，喜延



譽後進。宋白、趙昌言輩皆所薦也。嘗對太宗曰：臣受  
遇不次，惟以愚直上報。上曰：愚直何益？曰：猶勝姦邪。  
爾晚節頗以治生爲物論所惜。子昭度、昭升、昭用。  
溫仲舒，字秉陽，河南人。太平興國三年登進士第。嘗  
擯廢久之，因言稱旨，進用。累擢諫議大夫。淳化二年，  
樞密副使，改同知院。四年罷。至道二年，參知政事。咸  
平初，罷久之，兼御史中丞，以戶部尚書判昭文館。卒。  
年六十七。贈左僕射。仲舒有應用才，屢與寇準同進，  
謂之溫寇。始廢黜呂蒙正當路，力援進之。及驟用，反

攻蒙正爲士論所薄。

陳彭年，字永年，建昌軍人。幼好學，母惟一子，愛之，禁  
其夜誦書。彭年置燈密室，晝夜忘倦。嘗師事徐鉉，爲  
文喜嘲諷，爲宋白所惡。白知貢舉，屢加黜落。雍熙三  
年始登進士第。累擢至翰林學士。大中祥符九年，參  
知政事。天禧元年卒於位。年五十七。贈左僕射。子佺  
期、孫彥先。大中祥符間，朝廷典禮無不參預。凡儀制  
沿革刑名之學，皆所常練。雖談笑閒，屬辭不廢。當時  
制度雖前世所未有，必推引依據以成就之。時政大



小日有諮訪。應答該辯。一無凝滯。上之眷遇尤厚。加以慎密。外無知者。資性敏給。博聞強記。應舉時。京城賜酺。與同學出遊。自東華門構思。至闕前。已成一賦。其後雖處通顯。奉養無異貧約時。所得俸。唯市書籍。幼而篤學。老亦不倦。左右給使之。人有彌年不知其姓名者。所著文集百卷。唐記四十卷。

趙安仁字樂道。河南人。生而穎悟。十三歲通經傳。雍熙初。登進士第。累擢知制誥。翰林學士。景德三年。叅知政事。大中祥符五年。罷。知禮儀院。兼宗正卿。改御

史中丞。宗正如故。積官至尚書右丞。卒。年六十。贈吏部尚書。諡文定。子溫瑜。良規。承裕。以遺恩各遷官。安仁七子。各授以一經。居宗族。以雍睦稱。雖家人未嘗見其喜愠。操履純正。外晦內明。畏慎謙退。無事浮飾。有所獻納。退必焚橐。致身貴顯。無改儉素。尤練達典故。近世衣冠人物。制度沿革。悉能記之。在翰林。從幸澶淵。北戎請和。令學士各進答書。上獨用安仁所撰。亦以其能備記。太祖朝。書問規式。因獲預聞。通貨之議。虜使至。首命安仁接伴。其覲見儀制。皆所裁定。敏



於酬酢仍切事機時論以爲得體在宗正請依唐故事置修玉牒官奏以劉筠楊億夏竦宋綬爲之又爲仙源積慶圖皆統類精簡善議論好誨誘後生學士大夫以清德宗之有同學宋元與者篤學而早卒安仁力賜其後裔

任中正字慶之曹州人雍熙初登進士第歷外官多效翰林學士錢若水嘗薦其才累擢至樞密直學士知益州并州開封府大中祥符九年樞密副使改同知院又復爲副使天禧四年叅知政事兼太子賓客

仁宗卽位爲兵部尚書與丁謂善謂敗力營救之謂竄降中正太子賓客知鄆州復禮部尚書丁母憂哀毀過以疾卒年六十六贈左僕射諡康懿中正以孝行稱於鄉黨事親盡敬衣服簡質而飲食極於豐美子易弟中師

任中師字祖聖大中祥符二年登進士第累擢至右諫議大夫加集賢院學士龍圖閣直學士樞密直學士任布守河陽數上書論塞下事稱旨上欲用之呂夷簡素知中師上前數稱中師才不在布下慶曆初



遂竝召為樞密副使求補郡三年以禮部侍郎資政  
 殿學士知永興軍徙陳州請曹州踰年遂請老以太  
 子少傅致仕卒年七十七贈太子少保諡安惠初益  
 州稅及薪芻蔬果之屬中師知州奏盡蠲之性樂易  
 家財素豐雖處通顯自奉甚約其踐歷與中正多同  
 上數賜飛白書歸休於里中建御書閣鄉人榮之子  
 昱拱之

魯宗道字貫之亳州人少孤苦學嘗袖所為文謁戚  
 綸綸器賞之咸平二年登進士第徧歷州縣天禧元

年詔兩省置諫官六員不兼它職考所言以為殿最  
 宗道與劉曄同選擢為正言仁宗升儲除戶部員外  
 郎兼右諭德踰年改正左諭德及即位遷戶部郎中  
 龍圖閣直學士兼侍讀詔與呂夷簡按視雷允恭擅  
 移山陵皇堂事還是年參知政事天聖七年薨於位  
 年六十四贈兵部尚書諡肅簡時太常禮院言禮無  
 廢朝特輟視朝一日宗道質直遇事敢言不為勢所  
 屈為諭德時真宗一日遣中人名之至其家俟之久  
 方從酒家還使者曰即上訝遲將何以對宗道曰第



直○言○之○及○宗○道○見○帝○詢○其○所○之○對○曰○有○鄉○人○來○貧○乏○  
楛○盤○就○酒○家○飲○之○也○帝○善○其○無○隱○而○知○其○可○大○用○初○  
為○秀○州○海○鹽○縣○令○疏○治○東○南○舊○港○口○導○海○水○至○邑○下○  
人○以○為○利○號○魯○公○浦○在○諫○垣○時○諫○章○由○閣○門○始○得○進○  
而○罕○嘗○賜○對○宗○道○請○得○面○論○事○而○上○奏○通○進○司○自○是○  
為○故○事○因○言○守○宰○與○民○至○近○而○未○見○有○區○別○能○否○豈○  
朝○廷○所○以○為○民○之○意○今○除○一○知○州○補○一○縣○令○雖○甚○庸○  
暗○有○司○無○敢○擯○斥○舉○天○下○親○民○之○官○贖○貨○害○政○十○常○  
二○三○介○然○自○守○孳○孳○政○事○殆○未○易○得○尚○何○裕○民○美○化○

之○可○冀○乎○昔○漢○宣○帝○除○刺○史○守○相○必○親○見○而○考○察○之○  
今○命○知○州○通○判○知○縣○雖○未○暇○親○見○宜○令○中○書○詢○以○言○  
而○察○其○應○對○設○以○事○而○問○其○施○為○才○與○不○才○得○以○進○  
退○縣○令○則○命○流○內○銓○倣○此○施○行○庶○幾○得○良○守○宰○助○宣○  
聖○化○真○宗○嘉○納○之○宗○道○在○選○調○久○頗○患○銓○格○繁○密○而○  
曲○知○銓○吏○之○姦○弊○判○吏○部○流○內○銓○多○釐○革○之○凡○科○條○  
關○者○悉○揭○示○庶○下○人○以○為○便○七○年○居○政○府○裁○抑○僥○倖○  
不○冒○以○名○器○私○人○時○樞○密○使○曹○利○用○有○所○憑○恃○肆○為○  
驕○橫○宗○道○屢○折○之○於○上○前○凡○貴○戚○近○習○莫○不○斂○迹○子○



有功有立有開

按親民之官天子親見考察法始于漢而宗道繼請于宋至患銓格繁密釐革姦弊揭示科條慎重名器皆古今要務魯公真經濟才也

中書下原無詢字從新編加

止

隆平集第七卷

宋曾文定公編撰

南豐後學彭期訂

叅知政事

薛奎字宿藝絳州人父化光善命術奎生知其必至公輔淳化中奎登進士第多歷外官向敏中薦其才累擢至龍圖閣待制御史中丞龍圖閣學士三司使天聖七年叅知政事章獻太后崩大臣皆罷獨畱奎



欲以爲相而苦喘疾數辭位除資政殿學士判都省卒年六十八贈兵部尚書諡簡肅奎持身端重論不苟合善知人范仲淹明鎬龐籍在下位時奎皆以公輔許之卒如其言天禧初自淮南轉運副使疏真揚漕河廢三堰舟楫便之嘗館伴契丹使蕭從順從順言漢使至契丹皆見太后今請入見奎曰皇太后垂簾聽政雖本朝臣僚亦未嘗見也乃不敢請知益州蜀人以張詠比之仁宗嘗謂輔臣曰臣之事君多見有始而無終者奎曰保終始者豈獨臣下如唐開元

勵精爲治而天下晏然及其旣久放意荒侈以至大亂此不可不監也上深納之時邊臣言伺知契丹將大入寇輔臣俱言擇將備邊之策奎獨曰先帝與虜約和歲遺爲厚彼必不敢輕背約願持重已而邊報果妄太后謁太廟欲被黻冕奎固執不可及太后崩上謂輔臣曰太后大漸且不能言數引衣示朕殆意在黻冕乎奎曰然服之何以見先帝也卒以后服斂蔡齊字子思其先洛陽人曾祖爲膠水令凡九年而卒其子孫因家焉齊少孤好學李迪嘗見其所爲文



謂有大志。大中祥符八年，登進士第甲科。真宗見其舉止端雅，顧輔臣寇準等曰：得人矣。特詔金吾給騶從，因以爲例。累擢知制誥、翰林學士，加侍讀、龍圖閣學士。御史中丞復爲龍圖閣學士。明道二年，樞密副使景祐二年，參知政事。與宰相呂夷簡論事不合，四年罷出知穎州。卒年五十二。諡忠肅。齊不自伐，善知人。龐籍、楊偕、劉隨、段少連皆所薦也。有子早卒，以從子延慶爲嗣。其後有子曰延嗣。初，齊爲侍御史，知雜河陽。錢惟演請曲賜軍士，特支齊言賞罰者上之所

操非臣下所當請。天子新卽位，惟演聯姻太后，不宜私請一州以售已惠，搖動衆心。上遂不許。在翰林太后出閣中，金繒修景德寺，命爲記。內侍羅崇勳使人陰謂齊曰：趣爲記，當參知政事矣。齊故遲之。崇勳怒，讒於太后，遂出知河南府，改密州。太后諭宰相取所撰記始上之。章獻太后遺詔以楊太后同議軍國事，閣門趣班賀齊爲中丞。毅然召臺吏曰：毋追班。齊乃白執政曰：上奉太后十餘年，今始親政，豈宜以女后相繼耶？事遂止。在樞密，交趾虐其部人，有款宜州自



歸者千數。議者以為叛人，不可納。齊曰：彼去暴而歸，有德，宜納之。雖遣，必不復還。本部若散山谷，當為後患。不從。後數年，果為亂。錢惟演諂附，丁謂作樞密直學士，題名記，輒不列寇準於其間，而碑刻云：逆準不書。齊言於上曰：寇準社稷之臣，忠義聞於天下，豈可令姦黨厚誣。上遂令磨去。居政府，邊臣言契丹祭天於幽州，以兵屯境上。輔臣議備邊計，齊以謂契丹必不敢渝約。既而邊奏果無警。

蔡子思不阿附官闈戚宦以干進而薦龐籍等之賢辨寇準之誣得大臣之道矣

盛度字公量，餘杭人。端拱初，登進士第。數上疏論邊

事，奉使陝西，參質漢唐故地，繪為西域圖以獻。累擢知制誥、翰林學士。寇準罷相，度以嘗交結，周懷政貶和州團練副使。天聖初，復翰林學士、龍圖閣學士。承旨兼侍讀學士。景祐二年，參知政事。四年，知樞密院。坐令開封府吏馮士元強取其鄰所賃官舍為知府。鄭戩所發，罷知揚蔡州。應天府以太子少傅致仕。還京數日，卒。年七十四。贈太子太保，謚文肅。子山甫，甫崇甫。初，度因奏事，便殿真宗問其所上西域圖，內出繪，命工別繪。度因言前已圖漢所置酒泉張掖武



威燉煌金城五郡。比復究尋五郡之東南。自秦築長城。西起臨洮。東至遼碣。延袤萬里。有郡有軍。有守襟帶相屬。烽火相望。其形勢禦備亦至矣。唐始置節度使。後又以宰相兼領。用非其人。有河山之險而不能固。有甲兵之利而不能禦。豈不惜哉。今復繪其山川道路。區聚壁壘。爲河西隴右圖。願備聖覽。上稱其博度。嘗坐開封獄。失實。謫監洪州稅。上言請復賢良方正科。密詔撰策題。馳驛以聞。又請建四科以取士。且言經術之士。若典刑備舉。則政教流行。請設博通墳

典。達於教化科。堯試臣以事不直。以言語筆札求人。審官期於適用。請設才識兼茂。明於體用科。今戒警未除。調邊勞戍。必資良帥。以集事功。請設軍謀宏遠。堪任將帥科。獄市之繁。民命所繫。若推按失實。則枉情傷生。請設曉法律。能按章覆科。後亦取其才識兼茂。明於體用科。與賢良方正。能直言極諫。並行明道。中詔度與御史中丞王隨及三司詳定在京并外三十一州軍。舊禁解鹽地。分聽商旅入錢算鹽度。言通商有五利。遂施行之。度好學家。居惟圖書滿前。每歸



未嘗釋手。真宗嘗命與李宗諤、楊億、王曾、李維、舒雅、任隨、石中立同編通典。文苑英華。又嘗預注釋御集。真宗祀汾陰，仁宗在藩邸，以度掌起居牋表及畱守章奏封壽春郡王，特詔令撰謝恩表。所著有愚谷集、中書制集、銀臺集、翰林制集、極中集。天禧三年，郊恩赦文，許舍人給事中諫議母封郡太君，而學士不預。度官兵部郎中，因請進封其母，上特從其請。自是學士官未至諫議者，皆得封其母焉。度多猜險，僚友皆畏其傾，不敢妄語言。肌體豐大，艱於拜起，有拜之者。

俯伏不能興，或至詬罵，其褊戾如此。

原本初下有牽字守下有捉字坐作在

韓億字宗魏，其先真定人。後徙開封之雍丘，少力學。咸平五年，登進士第。王旦以女妻之，久歷外官。以旦在政府，避親及旦薨，乃稍進用。仁宗卽位，累擢龍圖閣待制、樞密直學士、御史中丞。景祐二年，同樞密院事。四年，改叅知政事。因諫官言不當，以子壻爲羣牧判官。寶元元年，罷知應天府，加資政殿學士，徙成德軍、澶州，遷尚書右丞。以太子太傅致仕。卒，年七十。三贈太子太保，諡忠憲。子綱、綜、絳、繹、維、縝、緯、緬、億、性。



方重有守。治家嚴肅。雖燕居。未嘗見其惰容。嘗奉詔  
監視向敏中諸子分財產。方丁謂用事。陰遣所親諭  
億欲買向氏長安華嚴川田。億至向第。面戒其諸子  
曰。土田衣食之源。不可鬻也。遂忤謂意。謂出之定州。  
曹瑋斥知萊州。慮其或拒命。乃詔億馳往代收其兵。  
欲緣以中億。而瑋既奉詔。謂亦不能害。二司更茶法。  
歲課不登。億承詔劾之。由丞相而下。當坐失當之罰。  
其不撓如此。益州故事。歲首官出米六萬石。或五六  
倍之。以濟貧民。億知州。當歲儉。乃數倍賑之。又疏江

流。溉民田數千頃。至今以爲利。初通判陳州。河決屬  
邑。億集瀕河丁夫。就伐薪芟。親督築。不賦於民。而河  
患平。知洋州。有富民李甲。喪兄而迫嫁其嫂。又誣從  
子爲佗姓。而并其資產。嫂訟之。十餘歲。吏受賂。不得  
直。億按舊牘。獨未嘗證。以乳醫億。密致乳醫。以驗決。  
衆皆誦服。在樞府。元昊歲遣人至京師。出入民間。無  
他禁。億請爲除館舍。以優待遠人。仍官爲主。其貿易  
實欲防之也。詔從之。又言天下承平已久。武備不戒。  
請二府各舉才任將帥者數人。稍試用之。喞嘶囉與



元昊相攻已而來獻捷朝廷議寵廝羅以節制億曰  
二虜皆藩臣今不能論令解仇又因捷而賞之豈綏  
御四夷之道當如是耶固執不可遂罷又言武臣宜  
知兵書而法在所禁請纂其要略以頒焉於是上自  
集神武祕略以賜邊臣其書遂徧天下

原本佚訛代斐訛茂  
出之作忌知收作牧

王醜字總之趙州人大中祥符元年登進士第除婺  
州觀察推官代還真宗見而異之特轉著作佐郎先  
朝幕職官到闕例皆得見故有是命累擢至天章閣  
待制樞密直學士景祐四年同知樞密院事康定元

年罷知河南府卒年六十四上輟朝一日贈戶部尚  
書諡文穆子政路初醜館於王化基之門樞密副使  
宋湜見之妻以女宋氏親族或侮易之化基曰後三  
十年醜當貴矣卒如其言醜爲三司鹽鐵副使時待  
制馬季良建言京師賈人常以賤價售京師茶鹽交  
引請官置務收市季良方挾章獻太后姻家有司莫  
敢忤其意醜獨執不可曰與民競利有傷國體它日  
仁宗見而諭之曰官市交引賴卿力言罷之甚善後  
以樞密直學士知益州戍卒有夜焚營脅軍校爲亂



者。驥潛遣兵環其營。下令曰。不亂者斂手。出門無所問。於是衆皆出。命軍校指亂卒得十餘人戮焉。及日郡人不知也。爲政有大體。不事苛察。蜀人愛之。在樞府屬西師不利。議籍鄉兵。久而不能決。緣是有江南之命。

宋綬傳

徽好原作懲建無合原作令無

宋綬字公垂。趙州人。幼聰警。額有異相。其外祖楊徽之。器愛之。徽之無子。盡付以家所藏書。以徽之遺恩。授太常寺太祝。年方十五。召試中書。真宗奇其文。特遷大理評事。聽於祕閣讀書。同校勘天下圖經。久之。

復召試學士院。除集賢校理。與父臯同在館閣。每賜書必得二本。世以爲榮。累擢知制誥。仁宗卽位。擢直學士院。天聖三年。爲翰林學士。明年兼侍讀。改龍圖閣學士。出知應天府。名還。欲大用。爲宰相張士遜所抑。復翰林學士。兼侍讀。龍圖閣學士。加端明殿學士。端明殿後。唐初置學士。馮道。趙鳳。首當其任。太平興國中。改爲文明殿學士。以授李昉。未幾。殿災。重建。改曰文德。遂不復置學士。至是。又置端明殿學士。以寵綬。綬辭免。龍圖及士遜罷相。明道二年。綬遂叅知政



事景祐四年罷爲尚書左丞資政殿學士留侍經筵  
明年加大學士知河南府康定元年知樞密院改叅  
知政事薨於位年五十贈司徒兼侍中謚宣憲子敏  
求敏修大中祥符初封禪覃慶上先賜綬同進士出  
身翌日遂由大理評事遷本寺丞後苑賞花羣臣皆  
賦詩命綬與晏殊同爲之序祀汾陰綬與錢易陳越  
劉筠所過採集地志風物故實每舍上之以備詢覽  
仁宗卽位章獻太后命綬擇前代文字可以贊孝養  
補政治者以上遂錄唐謝偃惟皇戒德賦孝經論語

節要唐太宗所撰帝範二卷開元臣僚所獻聖典三  
卷君臣正理論三卷上之太后稱制旣久上未嘗獨  
對羣臣綬言唐開元中睿宗爲太上皇五日一受朝  
處分軍國重務及三品以上除授決重刑明皇日聽  
朝除授三品以下決徒刑請令中書樞密院約先天  
制度非軍國大事及大除拜皆前殿取旨臣僚亦只  
疑脫奏○字前殿對繇是忤太后意而有應天之命太后崩詔綬  
定章獻明肅章懿二太后祔廟禮綬援春秋考仲子  
之宮唐儀坤故事請別立章懿太后廟建名奉慈以



安神主。上從其議。綬又言。帝王之御臣下。在乎總握威柄。賞罰二者。必自天子出。一紀以來。政出簾簿之間。今陛下方躬親萬務。聽斷有祖宗英風。天下延頸。踴躍見聖政。若非懲奸革弊。無以新四方耳目。而政刑號令。未見勝於垂簾之日。豈非三事大臣。未能盡輔佐之道耶。頃者除授恩澤。多所希望。而因緣邪倖者。邀取升擢。議者皆以謂恩出太后。而不由陛下。自親政以來。恩賞雖行。議者又云。悉出大臣。蓋大臣公爲朋黨。罔冒天聰。朋黨相結。其害實甚。或窺測上

旨。密令陳奏。或附會已意。以進退人大臣。市恩以招權。小人趨利。以售進。此風浸長。有蠹邦政。太宗嘗云。國家若無外憂。必有內患。外憂不過邊事。皆可豫防。惟姦邪無狀。若爲內患。深可懼也。真宗亦云。唐朝朋黨尤盛。漸不可制。以至帝室衰弱。願陛下思祖宗之訓。念王業艱難。整頓紀綱。正在今日。上大感悟。章惠太后營王中正舊第。爲道觀。諫官御史皆言。近詔罷修寺觀。而復有此興造。是詔令數更也。上曰。此太后自出奩中物耳。言者豈非邀名乎。綬因曰。是豈知太



后所爲但見忽興土木違近詔爾疑似之事人猶奏  
論設少決周防雖臺諫官不言四方亦自傳布爲聖  
政之累太祖嘗謂太宗受人諫疏直抵其非曾不爲  
恥豈若自不爲之而使人無言望陛下深監皇祖之  
言嘗防外廷之議已出詔令且要遵守無令喋喋之  
人自取名譽也綬又言自古守成之君必兢兢抑畏  
不忘顧省人心逸於久安患害生於所忽故立防於  
無事之際銷變於未萌之前若事至而後應不亦殆  
歟此固聖心所詳究臣猶願飭勵羣司交修庶職勿

以治平自怠勿以纖微不慎則可以保至尊而享洪  
業矣臣又切惟御下之道有三臨事尚乎守當幾貴  
乎斷兆謀先乎密守則不可移斷則不可惑密則不  
可干是三者治亂安危之所繫願陛下欽之念之至  
若朝務清暇淡居閒燕亦願陛下愛養聖躬節宣所  
欲夫四時聲味所以調適六氣乃克和平自然擁百  
靈之休享無疆之福豈不美哉初尚美人出宮上召  
綬面草詔云當求德闕以稱坤儀旣而聞左右以茶  
商陳氏女入宮綬因閒見曰陛下乃欲以卑賤者正



位中宮不亦與前日詔語戾乎及樞密使王曾入對上首詢之曾淡以爲不可上曰宋綬亦如此言時宰相呂夷簡屢論列上前卒罷之修郊祀綬嘗攝太僕卿陪玉輅顧問儀物典故占對辯給因撰鹵簿圖以進綬資性孝謹清介寡言經史百家莫不通貫朝廷有大議論皆所裁定於前世文章必淡考其得失而時之作者無所臧否集外祖楊徽之詩刻石嘉州明月湖上家藏書萬卷皆手自校正楊億嘗稱其文淳麗尤善賦詠自以爲不及也綬之筆札精妙上嘗取

所書千字文及其家之墨迹藏禁中所著有七集始綬疾不視事母問之必曰小瘳矣又通賓客候問若且安以舒母憂然後事俱已詳處雖家人不知也

李若谷字子淵徐州人少孤遊洛下因葬其考妣於緱氏而占籍焉咸平元年登進士第多歷外官累擢至諫議大夫集賢院學士龍圖閣直學士樞密直學士龍圖閣學士寶元元年參知政事康定元年以耳疾辭位罷爲資政殿學士明年以太子少傅致仕卒年八十以子淑在近侍優贈太子太傅天聖初若谷



奉使契丹時章獻太后同聽政奉使者辭於庭下例  
升殿受旨若谷辭已卽趨出太后怒遂不遣荆南駐  
泊都監王蒙正侍太后姻家多不法若谷知府屢繩  
之監司阿蒙正奏徙若谷潭州州有盜阻洞庭之險  
劫舟殺人投尸湖中前此捕獲多減死配隸它郡久  
復逸歸爲患滋甚若谷至潛使人擒以屬吏條前後  
罪狀磔於市湖中之盜遂息知延州夏人遣使來前  
守多延之堂上若谷獨廡下飲食之安豐芍陂孫叔  
敖所創爲南北渠溉田萬頃餘陂因旱歲民多侵耕

其間雨集將盈則盜決之陂涸失灌溉之利者甚衆  
若谷知壽州陂決獨調瀕陂之民使之畚築自是無  
盜決者并州自昔未有學舍若谷知州始建學於文  
宣王廟州多降湖閒常爲盜若谷命集累犯者以三  
人爲保有犯則并坐俊者則久而釋之在政府嘗言  
近歲風俗澆薄駕朋黨之說以汙善良君子小人各  
有氣類今一槩以朋黨名之忠臣恐懼臣亦無以立  
朝矣上善其言爲下詔倣諭焉又言轉運使提點刑  
獄失按所部官受贓類降差遣且監司所部甚廣巡



按不過留三二日。蓋未能徧察也。苟州郡察發一賊吏先聞朝廷。則監司不可勝黜。自是詔轉運使提點刑獄。再不覺察。部內官受贓。則降黜之。若谷質厚長於治民。所至郡邑。去多見思。一子淑。字獻臣。若谷通判亳州。真宗朝謁太清宮。淑年十三。獻文行在上。命賦朝謁太清宮詩。稱旨。賜童子出身。授試校書郎。天禧三年。宰相寇準薦之。除館閣校勘。準注釋御集表。爲檢閱官。天聖五年。召試。賜進士及第。箋注御製三寶贊章。獻皇太后發願文。擢史館修撰。上時政十議。

曰國體。曰災旱。曰言事。曰大臣。曰擇官。曰貢舉。曰科。遷曰閱武。曰時令。曰入閣。其議國體曰。今災沴旣頻。賦入有限。用度不足。恩賞或濫。吏員滋多。甄別殊少。近臣暫出外。若欲自留。有固辭而罷者。進不滿望。或不卽拜。有中路而易者。願陛下號令一出。要在必當。官職一授。勿復再改。至於國用未足。濫官未澄。冗兵疲馬。橫賞之類。願命近臣。知治體者。準三朝出入之數。而搏節之。議災旱曰。頻歲以來。亢陽爲孽。民多艱阨。歲不順成。洪範曰。僭常暘。若謂爵賞僭差。號令迭



改今閒遣使傳推存救之澤農服田畝無國家贍養之理臣願陛下修人事以應天變不然徒匱國力未足以弭民災也議言事曰先朝有劉驥者輕爲奏疏先帝語左右曰此人言多捭闔期在必行而近僞亂真詞旨易辨驥常杜法受賂古人察言觀行正爲此言也願陛下於進對之際防邪僻之人議大臣曰今歲兩府遷易頗頻其於政體似傷簡靜太祖初定天下用周朝三相六年始以趙普代之凡十年始代以薛居正沈倫太宗嗣位惟盧多遜以罪去而復用趙

普是後十八年中雖三四易相然所用者李昉宋琪呂蒙正張齊賢呂端而已當是時進者盡忠退者修省蓋進退皆出睿斷也真宗景德已前三命相惟張齊賢李沆向敏中呂蒙正畢士安寇準六人其後任王旦十二年向敏中再相亦十年此二人在位之日非無疑似之嫌誠信任無間而不重以權故也蓋權太重則難以久居言易入則得以譖愬真宗嘗謂宰臣曰今四方無虞與卿等慎守祖宗經制最爲急務此委相之大體也議擇官曰太平興國初文武朝官



班簿纔二百人咸平初已四百人天聖元年遂踰千人去歲覃恩以臣料之又軼天聖之數矣先朝嘗論審官流內銓主判若灼有能績爲衆所稱者密以名聞當特旨升擢願陛下引對之際一如先朝故事行之其老疾孱庸閒以退黜庶有所懲勸矣議貢舉曰皇朝開寶以前歲取進士不過三十人經學不過五十人自克復僞國吏員益衆始有廷試廣收人之制願陛下約今歲吏部闕官之數爲來年入等之準議科遷曰吏部故事選人格限未至能試判三節謂之

拔萃止用疑案古義觀其能否詞美者優以授職此有司銓品之式今常調選人判超循資是其比也陛下親御軒陛審覈課試非其稱已願罷此科又禮部茂才異等求出類之俊頗聞鄉薦不獲始來應舉望更爲嚴制以革倖冒議閱武曰開寶通禮有四時講武儀國初疆候未平多親閱試按礮角射太平興國間築臺楊村備大閱之禮咸平中闢場東武原發卒會射其後再幸飛山教場躬親訓練今兵革不試三十年矣士不聞鉦鼓之聲人不識行伍之列願陛下



按通禮。厲兵講事而躬閱之。議時令曰。開元定禮。有明堂及太極殿五時讀令之儀。冠服佩玉。悉從方色。月令不順。則五診應之。近歲氣序繆戾。水旱不節。天應以異。固當變而修正。願陛下申命有司。以氣至之日。集百官讀時令於天安殿。至尊升座。近臣伏聽。上下交儆。以凝庶績。議入。閣曰。唐寶曆之後。常以月朔御紫宸。行入閣之禮。後雖五代。猶或講求。施及聖朝。太祖五行其禮。多御崇元殿。備殿中金吾諸仗。設待制。復轉對官。崇元卽今天安殿也。乾德之後。改御大

明殿。卽今集英殿也。太宗三行其禮。別定新制。就文德殿。廷增設黃麾仗。真宗亦三行之。其禮之廢。已踰一紀。願因盛時。遵復其制。景祐初。知制誥自是五除翰林學士。兩以人言不拜。而三授端明殿學士。侍讀龍圖學士。亦皆再兼。初。知鄭州。作周陵詩三章。刻石。國子博士陳求古。以舊怨訟訕朝廷。乃徙應天府。其後。包拯吳奎言。其常請侍養父而不養母。中丞張昇繼論奏之。知河中府。感風眩而卒。年五十八。贈尚書右丞。淑聰悟博學。詳練典故。預修國朝會要三朝訓

疑脫淑字



鑿圖閣門儀制康定行軍賞罰格又獻繫訓二篇所  
 著有書殿集二十卷穎臯集五卷內制集三卷祭範  
 一卷平棘集邯鄲集各十卷別集并筆語各十五卷  
 子壽明復圭德芻

原本據下無以字春作寧察作密退者者字作則應舉舉  
 字作書

鼂宗慤字世良其先澶州人父迴太子少傅致仕宗  
 慤以蔭補校書郎屢獻所為歌頌大中祥符中召試  
 舍人院賜進士及第又名試除校勘校理累擢知制  
 誥入翰林為學士兼龍圖閣直學士康定元年參知  
 政事慶曆二年以疾免除給事中資政殿學士卒年

五十八贈工部尚書謚文莊子仲蔚宗慤有詞學當  
 制頗愜人望事父母至孝而真篤於故舊任子恩皆  
 先其族人在政府朝廷以金飾胡牀及金汲器賜响  
 厮囉宗慤言昔仲叔于奚辭邑而請繁纓孔子曰不  
 如多與之邑繁纓諸侯之馬飾猶不可輕與况乘輿  
 之器耶

原本真作直







官晏殊知應天府表掌府學上書執政萬餘言皆時  
之先務及終喪殊又薦之除祕閣校理明道初召爲  
右司諫累擢天章閣待制落職知饒州元昊叛復待  
制知永興軍夏竦爲陝西招討使進仲淹龍圖閣直  
學士以副之改知延州降官知耀州職如故徙慶州  
復舊官爲環慶路經略安撫沿邊招討使時始分陝  
西爲四路也慶曆二年除邠州觀察使辭不拜遷樞  
密直學士爲陝西路招討使三年樞密副使是秋改  
叅知政事四年出爲陝西河東宣撫使五年罷爲資

政殿學士知邠州以疾請知鄧州加給事中知杭州  
遷禮部侍郎祀明堂恩進戶部徙青州疾甚請穎州  
未至卒年六十四贈兵部尚書諡文正子純佑純仁  
純禮純粹御篆其神道碑額曰褒賢所著丹陽集二  
十卷奏議十七卷仲淹事母至孝以母在時家甚貧  
及旣貴非賓客不食肉妻孥膳服僅足而已姑蘇之  
范皆疎屬而置義莊以賙給之天下想聞其風采賢  
士大夫以不獲登其門爲恥下至里巷遠及夷狄皆  
知其名字衆莫知其所以然也初章獻太后欲以冬



至御會慶殿太常具儀請天子率百官獻壽仲淹在  
 祕閣上疏言王者奉親於內則有家人禮若稱觴殿  
 下是以天子北面行人臣事抑尊損威不可為後世  
 法不報又請太后復辟遂出通判河中府又章獻太  
 后遺詔以太妃楊氏為皇太后參決軍國事仲淹上  
 疏言太后母之名號也未聞因保育而代立者今一  
 太后崩又立一太后天下疑陛下不可一日無母后  
 之助也太妃雖受太后冊遂不復同聽政郭皇后廢  
 上書諫不報與御史中丞孔道輔合諫官御史伏闕

諫遣中貴人諭令詣中書宰相曰漢唐廢后舊矣仲  
 淹曰何為援前世衰政以累聖朝明日將畱百官班  
 揖宰相廷爭至待漏院有詔出知睦州即日就道明  
 道未言事者多摘太后時事以暴於朝仲淹諫曰太  
 后受遺詔保佑聖躬者十年宜掩其小故以全大德  
 上感悟始抑言者歲饑出使江淮體量安撫所至除  
 淫祀賑乏絕民有食烏啄草者擷草以進示六宮貴  
 戚戒其侈心因陳八事以諫其一曰祖宗時江淮饋  
 運至少而養六軍取天下今東南歲漕米六百餘萬

○時○相○能○無○慙○乎

○得○體

請



石府庫財帛又皆出於民而饑年艱食如此願下裁  
造務後苑作文思院糧料院取祖宗歲用之數則奢  
儉可見矣其二曰國家太平垂三十年暴斂未除濫  
賞未革近年赦宥既頻賞給復厚聚於艱難散於容  
易國無遠備非社稷之福也願無數赦推賞且祖宗  
欲復幽薊故謹內藏庶行師之時不擾於下其三曰  
江淮諸路歲已餽糧於租稅之外復又入糴兩浙七  
十萬以諸路計之不下二三百萬雖豐年穀價亦高  
官以傷財民且乏食今宜銷冗兵削冗吏禁游惰省

工作既損京師用度然後減江淮饋運以租稅上供  
外可罷高價入糴則歲省數百萬緡錢或上京師實  
府庫或以給還商旅商人既通則推貨務入便漸廣  
而入中之法可以兼行矣其四曰國家重兵悉在京  
師仰給度支則所養之兵不得不精也一卒之費歲  
不下百千卒萬人則百萬緡矣至七十歲放停是未  
停之前大蠹國用及其羸老歸復何託咸平中揀鄉  
兵人無歸望號怨之聲動於四野大中祥符閒選退  
冗兵無歸之人大至失所此近事之鑒也請下殿前



馬軍司禁軍選不堪披帶者別立本鄉州軍就糧指  
揮至彼有田園骨肉者許之歸則不至失所矣其五  
曰緣邊市馬歲費不貲罷之則絕戎人行之則困中  
國自古騎兵未必爲利開元天寶閒牧馬數十萬匹  
祿山爲亂王師敗績於函谷會何救焉然西北戎馬  
不可牧既至京師宜多鬻於民間或有邊用一呼可  
集重稅以禁江淮小馬使不至近裏州軍則西北之  
馬可行外慰戎心內減芻秣以億萬計其六曰發運  
司歲漕六百餘綱省員殿侍以歲勞改班行若綱運

可減則歲改職者止賞以緡錢諸州都知兵馬使滿  
歲如實廉幹須知州通判同罪保舉方與班行武臣  
薦子弟並令引見試驗若無所取及年幼者止與奉  
職至殿侍而已其七日百司流外日以增冗請罷招  
置三五年可去其半舊二百人者以百人爲額餘並  
移補諸司其八曰真州建長蘆寺役兵糧已四萬斛  
棟宇塑像金碧之資又三十萬緡施之於民可以寬  
重斂施之於士可以增厚祿施之於兵可以拓舊疆  
矣上嘉納之及在從班言事益無避因言古之治亂



繇○用○人○得○失○此○宰○相○之○職○也○獻○百○官○圖○指○其○遷○轉○次  
 序○遲○速○曰○如○此○可○以○為○法○陛○下○不○可○不○察○又○獻○四○論  
 一○曰○帝○王○好○尚○二○曰○選○賢○任○能○三○曰○近○名○四○曰○推○變  
 其○大○指○言○治○亂○繫○所○任○區○別○而○進○退○左○右○人○主○之○權  
 也○不○可○以○委○臣○下○上○因○面○質○於○宰○相○呂○夷○簡○夷○簡○以  
 為○仲○淹○離○間○君○臣○至○交○論○上○前○出○知○饒○州○殿○中○侍○御  
 史○韓○續○希○旨○請○榜○仲○淹○朋○黨○於○朝○祕○書○丞○余○靖○上○疏  
所謂言人主易言大臣難也  
 言○仲○淹○嘗○言○陛○下○母○子○夫○婦○之○閒○尚○加○優○容○今○以○一  
 言○觸○大○臣○遽○至○黜○逐○非○朝○廷○福○太○子○中○允○館○閣○校○勘

尹○洙○自○幼○與○仲○淹○善○兼○師○友○且○嘗○被○論○薦○請○從○降○黜  
 館○閣○校○勘○歐○陽○修○移○書○左○司○諫○高○若○訥○責○其○依○違○若  
 訥○繳○奏○之○靖○等○悉○貶○其○後○延○州○諸○寨○失○守○東○西○四○百  
 里○無○藩○籬○人○心○危○恐○知○州○張○友○辭○不○知○兵○且○老○乃○以  
 仲○淹○代○之○析○州○兵○馬○為○六○將○將○三○千○人○隨○部○分○教○之  
 使○更○禦○賊○朝○廷○推○其○法○諸○路○又○築○青○澗○城○以○扼○寇○衝  
 復○屬○羗○數○千○落○墾○田○二○千○頃○許○互○市○通○有○無○又○建○康  
 定○軍○積○蒲○充○民○租○春○則○徙○兵○就○糧○減○饋○運○之○費○三○之  
 一○時○議○諸○路○討○賊○獨○仲○淹○固○守○鄜○延○不○從○及○元○昊○偽



請和仲淹答書令去僭號元昊復有書不遜仲淹焚其書不以聞執政以為不當輒通書而又擅焚之參知政事宋庠請論以軍法上不從降員外郎知耀州職如故未逾月徙慶州而復其官州之西北有寨據復橋川南通鳳州華州池北扼白豹金湯種落彊悍而善耕久不能城仲淹知兵一日擁兵城之賊騎三萬薄關城下佯北仲淹戒諸將持重勿過河既而果設伏河外城成詔賜名曰大順城環州屬羗明珠滅臧二族各萬餘人皆附賊仲淹又請復細腰城胡蘆泉諸

寨招致二族以扼賊又復近羗千三百餘帳葛懷敏之敗關中民皆竄匿山谷乃率部下兵赴援而募兵

關下人心始安仁宗初按圖示左右曰若得仲淹出

仁宗之明

援涇原可無憂矣或以為恐道遠不能至後數日上下其章謂宰相曰仲淹果出援如所料在政府欲倣周官以六卿事分委輔臣而自領兵刑之任上方銳意政事數於天章閣詢執政世務仲淹言天下之治莫若守宰得人欲得人先擇轉運按察使又云取士不可以不根行實而先詞華圭田不均則不足以養



廉吏。農桑不課。則民失業。詔令屢更。則下不信。又請復府兵以宿衛京師。併縣邑以寬徭役。又欲減五品以上任子例。明年與韓琦列上禦邊四策。既欲改制。故忌之者衆。而僥倖者不便。因出宣撫。遂罷政事焉。王倫之叛。州縣官吏有不能守者。朝廷議欲盡誅之。仲淹曰。平時諱言武備。盜賊之至。責守臣死事。不可。故守令皆得不誅。仲淹所至。恩威竝行。鄧慶之民并西陲屬羗。皆繪像生祠之。其卒也。上尤嗟惜焉。丁度字公雅。開封人力學。有守大中祥符四年。登服

勤詞學科。累擢知制誥。翰林學士兼侍讀。加承旨。在

翰林凡七年。仁宗問用人以才與資孰先。對曰。承平

時宜用才。諫官孫甫乃言。度請閒自求柄用上。論輔

臣曰。度侍從十五年。數論天下事。未嘗及其私。甫何

從得此。遂除工部侍郎。樞密副使。時慶曆五年。明年

改叅知政事。八年罷。為紫宸殿學士。翰林侍讀學士。

進觀文殿學士。積官至尚書右丞。卒年六十四。贈吏

部尚書。諡文簡。子諷。諫舊制。監司及藩鎮辭見。皆賜

對。仁宗初即位。止令附奏。度言附奏非所以防壅蔽。

劉云承平時宜用資。槍攘時宜用才。丁公雅之言。非是。宜來孫之翰之効也。



也。又作王鳳論諷章獻太后以檢外戚。天聖閒太史上言永昌陵有白氣當徙陵以厭之。度奏神道貴靜。陵寢大事不可用術者言輕議改易事。乃止。康定初劉平石元孫戰陷上問禦邊計。度奏中國宜以智勝。難以力克。今莫若謹亭障。遠斥埃。控扼要害。條上十策。名曰備邊要覽。方西事未寧。知樞密院宋綬私忌。不給假度。請無以邊事責成。大臣給休假如故。無使外夷窺朝廷。深淺上從之。度為羣牧使。上言天聖中牧馬至十餘萬。其後言者以天下無事。遂廢八監。陝

西河東歲市二萬二百。纔能補京畿塞下之闕。自用兵數年。所市馬比常歲特三之一。請下令河東京東京西淮南籍丁壯為兵處。有能畜一戰馬者。與免二丁。仍不升戶等。以備緩急。如此則國馬蕃矣。度在經筵。上每呼學士而不名。嘗問著龜占應事。對曰。不若以古之治亂為著龜也。上出欵器以示之。曰。朕欲臨天下以中正。對曰。臣等亦願以中正事陛下。因奏太宗時嘗作此器。真宗為之贊。上遂製敲器。論賜之。度性純淡。不事威儀。左右無姬侍。喜論時事。在政府。召



諸子謂曰。王旦爲宰相十二年。卒之日。其子猶有爲布衣者。自今吾不復有請矣。爾曹宜自勉。嘗作慎言賦。書紳銘。以戒諸子。又著邇英聖覽十卷。龜鑑精義十二卷。慶曆兵錄五卷。贍邊錄一卷。編年總錄八卷。管子略要五篇。

吳育。字春卿。建州人。天聖五年登進士甲科。又舉賢良方正入等。屢歷外官。始擢知制誥。翰林學士。慶曆五年。除樞密副使。是年。叅知政事。六年。復樞密副使。七年。罷。知許州。徙蔡州。加資政殿學士。知河南府。徙

陝州。永興軍。丁父憂。服除。召兼翰林侍讀學士。以疾辭。改知汝州。又辭。以集賢院學士。判西京。留司御史臺。皇祐五年。加資政殿大學士。判西京。提舉醴泉觀。判都省。除宣徽南院使。判延州。疾復作。請便郡。知河中府。徙河南府。卒於資政殿大學士尚書右丞。年五十五。贈吏部尚書。諡正肅。子安度。安矩。安素。安正。安本。安序。安厚。安憲。安節。有文集五十卷。育常知汝州。襄城縣。宗室多葬襄城。以中貴人典護。民患其擾。育請所須。當從官。給非特省費。民甚便之。知太常禮院。



言禮文殘缺願詔諸儒裁定乃詔修禮書故事尚書省集議在朝則先職入省則先官官卑而職高者嘗託事不至景祐中遂罷兩制清望有議而不集非所以慎重求至當之意乃請使異席不相壓則適中矣衆議是之元昊僭稱帝還所授旌節議者皆謂發兵坑小醜爾育獨曰元昊名爲臣其寸土尺賦不入縣官窮漠之外陰僭輿服久矣儻稍易其名猶足順撫而收之奏不報而後卒用其議章懿太后升祔真宗廟言者請覃恩給賞育力諫止旣而上語輔臣曰外

甚怒執政宜慎之育對曰臣旣以身許國何避耶山

東盜起上遣中使察視還言盜不足慮也兗州杜衍

鄆州富弼山東人甚尊愛之臣中人險詐可畏如此以爲憂上欲徙二人

育在政府曰盜誠無足慮者小人乘閒以傾大臣非

國家之福議遂寢育知蔡州以伍保法檢制盜賊京

師喧傳妖人數十在蔡州詔遣中使以名捕者十人

使至請以巡檢兵趣搜山索之育曰必欲得妖人還

報耶請畱此勿往使者以爲然頃之召十人者皆至

械送闕下皆以無罪釋告者遂抵法畱司御史臺舊



不領民事育在西京河陽人民以張堯佐裁決稽積多詣育育判於紙尾堯佐畏恐卽奉行焉夏人旣納款而竝邊種落數侵爲患龐籍守并州欲築堡備之育判延安因謂要契未明亟城則爭而受患者麟府也乃移文河東又與籍書及疏於朝不報未幾河外殺驍將郭恩而太原將佐皆以罪去育立朝敢言始自樞密副使改叅知政事數與宰相賈昌朝議事上前爭辨不已遂復還樞府明年大旱御史中丞高若訥以大臣廷爭爲不肅故雨不時若因而罷之育初

加大資政名還上數欲復大用而諫官劉元瑜譖之故有延安之命晚年喜作詩在西臺與舊相宋庠追裴白故事酬唱至數百篇育性識明達所至條教簡而易行辨論古今明白利害使聽之者曉然不疑程琳字天球永寧軍人也大中祥符四年舉服勤詞學科中選授泰寧軍節度推官天禧中名試除直集賢院累擢知制誥權御史中丞樞密直學士龍圖閣學士正除御史中丞不拜以翰林侍讀學士知開封府改三司使景祐四年叅知政事寶元二年鄭戩知



開封府發琳使府吏馮士元抑孀婦市第及買女口  
責光祿卿知潁州久之復戶部侍郎知青州又復吏  
部知天雄軍又復尚書左丞爲資政殿學士及建天  
雄軍爲北京內侍皇甫繼明典營造宮室欲侈大而  
琳以爲方事備邊又困民以土木不可數有論奏上  
遣御史魚周詢按視遂罷繼明獨命琳遷工部尚書  
加大學士河北路安撫使慶曆六年建節知永興軍  
陝西安撫使皇祐元年拜使相判大名府以武昌節  
制換武勝又換鎮安之本鎮卒年六十九贈中書令

諡文簡子嗣隆嗣弼嗣先天聖五年琳館伴契丹使  
蕭蘊杜防蘊出坐圖謂琳曰中國使至契丹坐位高  
契丹使至中國坐位下請升之琳曰此真宗皇帝所  
定不可改也防又曰大國之卿可乎琳曰南北兩朝  
安有大小防不能對上令與宰相議或曰此特細事  
爾將許之琳曰更欲大者奈何遂止琳知益州上元  
張燈先戒火備曰有火卽救之勿以白果有火終燕  
人無知者有告振武軍變者監軍以白琳曰軍中動  
息我自知之苟有謀不待告者來卒不至蜀人歲爲



社○會○以○祀○灌○口○琳○曰○往○時○不○誅○李○順○故○大○亂○乃○捕○為○  
 首○者○戮○之○餘○百○數○配○內○地○或○以○寬○聞○上○遣○使○視○蜀○無○  
 事○得○解○在○三○司○或○請○募○商○人○輸○粟○京○師○罷○江○淮○漕○運○  
 琳○曰○猾○商○要○價○而○粟○不○至○奈○何○又○有○請○并○稅○名○目○琳○  
 曰○使○牛○皮○食○鹽○之○類○合○為○一○穀○粟○黍○豆○合○為○一○易○於○  
 句○拔○可○也○後○世○有○興○利○之○臣○復○以○舊○名○增○之○是○重○困○  
 民○無○已○時○也○在○政○府○有○議○重○賄○吮○嘶○囉○使○討○賊○因○以○  
 其○地○與○之○琳○曰○使○吮○氏○得○地○是○又○有○一○元○昊○也○不○若○  
 用○閒○使○二○羗○勢○離○則○中○國○之○利○矣○知○永○興○元○昊○死○諒○  
○深○識○遠○慮○之○言○庸○人○不○知○每○貽○後○患○  
○軍○國○老○謀○

祚○立○尚○幼○以○三○大○將○分○治○其○國○或○謂○因○各○授○三○將○節○  
 度○使○以○分○弱○其○勢○琳○曰○幸○人○之○喪○非○所○以○示○夷○狄○不○  
 如○因○而○撫○之○議○者○以○為○失○機○會○初○元○昊○雖○叛○猶○遣○使○  
 入○朝○朝○議○欲○誅○其○使○琳○曰○古○者○兵○交○使○在○其○閒○宜○善○  
 遣○之○以○示○大○體○其○後○使○者○益○驕○大○臣○皆○咎○琳○曰○始○不○  
 誅○以○罪○有○在○也○今○既○驕○暴○其○罪○誅○之○以○明○國○法○又○何○  
 患○耶○琳○持○重○不○撓○守○魏○凡○十○年○魏○人○愛○之○為○立○生○祠○  
 章○獻○太○后○時○常○上○武○后○臨○朝○圖○其○為○人○嚴○淡○長○於○政○  
 事○平○時○議○論○不○少○下○人○至○朋○僚○故○舊○飲○酒○笑○歌○不○復○



有勢位之閒、世或以嗇於財而厚自奉爲誚。明鎬字化基、密州人、大中祥符五年登進士第、屢從薛奎辟、奎大用、盛稱鎬有廊廟才、累擢至天章閣待制、龍圖閣直學士、樞密直學士、自成德軍入、知開封府、會盜據甘陵、爲體量安撫使、及文彥博宣撫河北、以鎬副之、賊平、進端明殿學士、給事中、彥博數推功於鎬、擢三司使、慶曆八年、叅知政事、未幾發疽、薨於位、年六十、贈禮部尚書、諡文烈。仁宗初聞其疾、亟謂輔臣曰、鎬忠亮有勞、欲及其未亂、一召見之、旣至、惻

然謂曰、方賴卿謀國事、遽有此疾、鎬已氣索、猶能頓首稱謝、翌日遂逝。鎬端重寡言、所至安靜、有體臨事不苟、爲陝西轉運使、閱同州廂軍得材武者三百人、教以彊弩、奏爲清邊軍、最驍悍、其後陝西河東悉置此軍。

王堯臣字伯庸、應天府人、天聖五年登進士第、累擢知制誥、翰林學士、權三司使、兼端明殿大學士、加承旨、羣牧使、皇祐三年、樞密副使、嘉祐元年、叅知政事、上欲除樞密使、爲掌制學士、胡宿所抑、止進吏部侍



郎薨於位年五十六贈左僕射諡文安子同老明老  
堯臣爲右司諫郭皇后廢且死中外以爲宦官閹文  
應進毒堯臣請先治其左右侍醫者不報后在殯上  
元節有司俟乘輿觀燒燈堯臣言后已復位號則不  
當遊幸上爲輟張燈一夕在三司時入內都知張永  
和建議欲收民錢十三萬以助軍費堯臣言於上曰  
此唐德宗所以致朱泚之亂也夔州路轉運使請增  
井歲課十餘萬緡事下三司堯臣以爲上恩未嘗及  
遠人而反浚取厚利適以斂怨也皆罷之康定初爲

陝西體量安撫使上言故事使者所至輒稱詔存問  
官吏將校而不及民自元昊反三年于今關中之民  
不勝彫弊宜有以勞徠之上從其請降敕俟賊平蠲  
其租賦二年又言陝西二十萬兵分屯四路不足以  
自守涇原最爲要害處請萬人以屯渭州以制山外  
如此賊不敢輕出犯塞也好水川失利韓琦降知秦  
州范仲淹以擅答元昊書降知耀州堯臣言二人皆  
忠義可任不當置之散地又薦种世衡狄青有將帥  
才明年葛懷敏敗邠涇以東皆閉壘自守仲淹自將



慶州兵捍賊始引去。上思其言，乃復命安撫陝西，而以琦仲淹爲招討置府涇州，益屯兵三萬人。堯臣行邊，至得勝寨，適弓箭手閉城亂。堯臣作書諭以禍福，射入城中，悉出降。又請罷涇原五州營田，益募弓箭手於德順軍。又請廢潼關，在樞府二年，務裁抑僥倖。至有鏤匿名書傳之京城者，上信之，益不疑。乃擢參知政事。堯臣典內外制十餘年，文詞溫潤，得王言體。有文集五十卷，垂絕遺，奏勸上蚤擇宗室之賢者爲

皇嗣云

原本掌詔常請下無增字

程戡字勝之，許州人。天禧三年登進士甲科，累擢天章閣待制、樞密直學士、進端明殿學士、知成都府。名見許，以還爲執政。明年遂名爲參知政事。時至和元年也。嘉祐元年，以文彥博親嫌，改樞密副使。五年罷爲宣徽北院使，判延州。英宗卽位，加節度使，再任。以年過七十告老，十數奏不許。復以疾告，許還。至同州卒。年七十七。諡康穆。戡嘗知瀛州，契丹使過，稱疾求小幘相見。戡曰：疾可無相見。相見則宜如禮。在延州，橫山酋豪請以兵乘塞而自，以其屬取靈夏歸中國。



戡奏言諒祚數悖慢而多殺戮人人離心今其酋豪如此可許之時英宗不豫大臣重生事不從戡久分帥闡號習邊事世多請其折節交宦者

疾告原作癸病

孫抃字夢得眉州人六世祖長孺喜藏書爲樓而置其上蜀人號爲書樓孫家天聖六年登進士甲科累擢知制誥翰林學士皇祐中權御史中丞制下諫官奏抃非糾繩才抃手疏言方今士人趨進者多廉退者少以善求事爲精神以能許人爲風采捷給若嗇夫謂之有議論刻深若酷吏謂之有政事諫官所謂

才者無乃在是乎若然臣誠不能也仁宗察其言趣視事其後仁宗欲用耆舊故擢抃參知政事樞密副使抃年雖未高而浸益昏忘語言舉止人以爲笑御史韓縝彈奏遂罷政事以太子少傅致仕卒年六十九諡文懿抃爲中執法數言事內臣王守忠特恩遙領節度抃奏罷之張貴妃薨追冊爲后且有建陵立廟之議抃固爭不從因伏不起上改容遣之陳執中筆婢出外舍死或曰嬖張殺之事聞命近侍制獄取證左執中弗遣有詔勿推抃奏疏十上竟緣是罷相



并前後多稱薦士大夫居侍從雖久而恬於進取人  
以為長者

原本趣作趨遂上有而字張貴妃張字作楊

隆平集第九卷  
宋曾文定公編撰  
南豐後學彭期訂

隆平集第九卷

宋曾文定公編撰

南豐後學彭期訂

吳廷祚

字慶之太原人在周為樞密使宋興加中書  
門下三品以父名璋故也建隆初為雄武軍節度使  
改京兆尹卒贈侍中子元輔元載元辰太祖征李筠  
嘗詢廷祚以為筠無謀恃勇離巢穴出戰則擒之必



矣。卒如所料。元辰字君華，尚太宗蔡國公主，累擢至山南東道節度使，兩知河南，嘗值河溢，城將壞，躬涉泥濘，督工壅塞，民有避水於林杪者，既濟，以舟楫，又以家財賑之。時數郡被水患，獨元辰所部民無墊溺。知定州，適契丹入寇，王超、王繼忠領兵踰唐河戰，元辰度其必敗，潛發兵護河橋。超等果失利，虜衆至橋，見陣整而遁。徙知徐州，以疾卒。年五十，贈中書令，廷祚厚重寡言，治家有法，好儒學，聚書數千卷。至元辰聚書，乃至數萬卷，喜讀左氏春秋，尤通內典，精筆札。

臨事慎重，御下有術，在藩鎮能愛民，待賓佐必盡禮，奉身簡素，所得祿賜均及親族。國朝以來尚主者，獨稱其賢。子守禮，守嚴，守良，守讓。

王仁贍字子豐，唐州人。顯德中隸太祖帳下，卽位累加進擢。乾德二年，樞密副使。是年命與王全斌、崔彥進伐蜀，蜀平，有訟同諸將取民間子女玉帛，責右衛大將軍開寶末，領三司近十年，頗縱吏爲姦，時副使陳恕輩率任苛察，與上遇，互持本司短長，仁贍不能勝責。唐州防禦使卒。



李處耘字正元上黨人在周以右職隸太祖帳下建隆元年擢宣徽北院使三年改南院兼樞密副使乾德初周保權乞師討張文表命處耘與慕容延釗赴之太祖面授處耘方略俾圖荆南處耘次江陵百餘里外潛遣數千騎入據其城高繼冲請舉族歸朝荆湖平坐與延釗不協責淄州刺史卒年四十七處耘多機謀嘗權知揚州有善政識度詳敏論事造理頗以功名自任惟受遇思報勇於敢爲朝廷以延釗宿將乃獨罪處耘處耘亦不自辨子繼隆繼和繼明繼

靖太宗明德皇后卽其女也

李繼隆字霸圖以父任爲供奉官嘗從官還自蜀與馬陸棧道絕澗十餘丈不傷又更戍邵州至長沙遇蠻寇手足中藥箭得良藥無恙從曹彬平江南太祖謂曰昇州平可持捷書來特內侍十數皆伺獻捷有機事悉不願行繼隆獨赴闕太祖以城未下頗怒其來繼隆奏曰途遇大風天地冥晦城破之兆也翌日捷書至上語之曰如汝所料矣江南僞將盧絳擁兵數萬繼隆獨諭以威信而降征太原討幽州圍范陽



繼隆皆與焉。又從崔翰戰徐河，從潘美出代北，皆有功。雍熙初，屢破繼遷之衆，曹彬北伐，繼隆獲虜，爲貴臣一人，彬欲上其功，繼隆力止之。師還，諸將兵敗，獨繼隆振旅成列，虜不敢犯。卽以繼隆知定州，有敗軍數萬集城下，繼隆給券，俾各持詣所隸。太宗嘉其有謀，端拱初，爲鎮州都帥，以萬人敗虜八萬，逐北數十里。初，詔止令堅壁清野，繼隆曰：「闕外之事，將帥得裁也。」中黃門杜延壽止之，不能。故成功。太宗召還，面加獎激，常受詔。由旱海護靈州軍糧，繼隆固執，由古原

州蔚茹河路爲便。太宗從之，乃帥師以進。壁古原州，是爲鎮戎軍。累擢至節度使。真宗卽位，加同平章事。景德初，北虜入寇，上親出征，命繼隆爲駕前東西排陣使。先至澶州，十一月二十四日，虜數十萬逼州北城，繼隆與石保吉大破之。強弩斃虜將順國王撻覽，追奔數十里。二十六日，駕至澶州，幸北門觀兵，名見問勞久之，其部伍嚴整。二年春，加賞進其階邑，命下而卒。年五十六。贈中書令。繼隆雖貴胄，而能以智謀自將。好學，喜接儒士。子昭慶，避章獻太后祖諱，故改



昭亮名四歲補供奉官父繼隆北征昭亮尚幼遣持詔軍中問方略及營陣衆寡之勢還奏稱旨累擢至西上閤門使仁宗卽位遷東上自是屢領邊任管軍慶曆八年除宣徽北院使加南院知定州以疾願還爲景陵宮使改昭德軍節度使卒年七十一贈中書令諡良僖昭亮爲人和易喜交權要而軍政頗嚴爲殿帥有卒博於都市而撤屋椽相擊者捕斬之其軍校連州刺史宋緒廷謝亦杖之庭下上祀南郊而騎卒失所挾弓明日當加恩澤昭亮謂宿衛不謹不可赦原

卒配隸下軍子惟賢惟寶惟實惟賁惟贊惟賡惟賀惟貫惟賞

原本論以字作之

石熙載字凝績洛陽人周顯德中登進士第太宗初領泰寧軍節度使辟掌書記尹開封辟推官卽位累加進擢太平興國四年正月簽書樞密院事三月改副使六月樞密使八年以疾求解機務除左僕射卒年五十五贈侍中熙載有文行立朝無顧避喜稱薦善人有長者之譽子中立字表臣年三歲喪父朝廷錄遺以爲供奉官十八獻文改光祿寺丞賜五品服



家富於財、悉推與諸父、久之除直集賢院、與楊億、劉筠、陳越、李宗諤相厚善、凡校祕書、更中立手者、皆爲善本、累擢知制誥、翰林學士、加承旨、兼龍圖學士、景祐四年、叅知政事、明年罷爲戶部侍郎、資政殿學士、慶曆四年、自吏部侍郎除太子少傅、致仕、遷少師、卒年七十八、贈太子太傅、諡文定、子居簡、從簡、初中立家產、歲入百萬、死之日、不能給喪具、天子聞而哀之、贈白金三百兩、中立疎曠、少威儀、善諧謔、頗諳臺閣故事、不汲汲近名、請老於家、客至門者、必延飲、非醉

不得去

楚昭輔字拱辰、睢陽人、初太祖建節、嘗召置左右、建隆初、擢軍器庫使、開寶六年、樞密副使、九年、樞密使太平興國六年、以疾罷爲右衛上將軍、卒年六十九、李崇矩字守則、上黨人、在周爲作坊使、太祖掌禁旅、數相過從、建隆初、累加獎擢、以澤潞功授大將軍、三年、除宣徽北院使、判三司、乾德二年、樞密使趙普作相、與崇矩分秉國政、以女妻普之子厚、相交結、太祖不悅、因門下客以陰事告、開寶五年、罷除節度使、改



大將軍太宗卽位授嶺南都巡檢就改瓊崖僭萬四州都巡檢代還除千牛衛上將軍卒贈太尉諡元靖崇矩寡言尚信義嘗爲晉史洪肇親吏洪肇被禍崇矩方事世宗旣貴遇洪肇之孫必優而加禮之子繼昌仕至連州刺史國史有傳繼昌之子曰勗尚太宗第八女萬壽公主舊制尚主者升居諸父之列真宗特於其名上益以遵字陞爲崇矩之子焉遵勗字公武初授左龍武軍將軍駙馬都尉賜第永寧里所居堂輓花有翔鳳命工琢去主服有虬龍文屏藏之真

宗喜顧待加異嘗稱其好學累官至鎮國軍節度使知許州卒年五十一贈中書令諡文和遵勗喜讀書兼達釋氏性理之說居第園池聚奇花果美石多致自數千里者其費不貲有會賢閒燕二堂東北隅有莊曰靜淵引流水周舍下嘗師事楊億億卒制服爲營其家事在許州奏乞至具茨山奠億之墓著閒燕集二十卷外館芸題七卷子端懿端愿端憲端慤李端懿字元伯萬壽公主子也七歲授如京使積官至鎮潼軍節度觀察畱後十年不遷仁宗特授以節



制御史中丞韓絳以謂非功不當除端懿亦辭不拜  
 知澶州卒年四十八贈節度使其弟援例冊贈侍中  
 端懿和厚多讀書喜賓客所與游從皆時之賢士大  
 夫子詢謹諛訐州表之至具英山真獻公墓者開燕  
 弭德超嘗給事晉邸太平興國中累擢至酒坊使嘗  
 誣曹彬彬不辨八年擢宣徽北使兼樞密副使怒王  
 兼發野人封聖之語去德園出萊青芥果美可多好  
 賦詩賦平正十一體中書令編文時藝最喜讀書  
 不喜飾言其德普稱其汝果官至殿因軍前受封

顯等居其上訴之且曰我有安社稷功汝等何人反  
 在我上上無執守為汝輩眩惑顯等以聞命鞠得實  
 削奪官爵同家屬配隸瓊州

楊守一字象先其先洛陽人唐末徙家宋鄭閒初為  
 晉邸涓人即位累擢至翰林副使初名守素上為更  
 其名與趙鎔柴禹錫相里勳同告秦王廷美陰謀端

拱元年除宣徽北院簽書樞密院事卒年六十四贈太尉

張遜遼城人駙馬都尉魏咸信同母兄也事晉邸即  
 位補殿直屢加進擢端拱二年除宣徽北院使簽書



樞密院事淳化二年改副使又加知院事四年坐與  
 寇準不協罷責諸衛將軍卒年五十六贈桂州觀使  
 曹彬字國華真定人父芸為成德軍兵馬使周祖貴  
 妃張氏彬之從母也仕周至引進使建隆初遷客省  
 使乾德二年伐蜀以內客省使監歸州路行營劉光  
 弼軍兩川平除節度使開寶元年為宣徽南院使八  
 年平江南九年樞密使太宗即位加同平章事太平  
 興國八年為弭德超所誣罷為天平軍節度使雍熙  
 三年詔彬與崔彥進傅潛潘美等北伐雖尅新城破

涿州而繼有岐溝之敗降右驍衛上將軍真宗即位  
 復樞密使加檢校太師平章事咸平二年薨於位年  
 六十九贈中書令追封濟陽郡王彬敬慎和厚在朝  
 廷未嘗忤旨亦未嘗言人過失平蜀還太祖詢官吏  
 善否對曰軍政之外非臣所聞時諸將皆欲屠城殺  
 降彬獨任恕而戢下所至悅服太祖降璽書褒之時  
 諸將多有子女金帛彬橐中惟圖書衣衾而已故主  
 帥俱貶而彬獨進擢及征江南亦緩攻取數遣開諭

○古○今○名○將○所○不○及○



所全活多矣

亦冀其降。雖已城陷，猶納歸款，偽朝君臣賴以獲免。自出師至凱旋，士衆畏服無輕肆者。其軍政如此。雖弭德超之譖，暫解機務，而太宗察其忠謹，待遇彌厚。北征諸將以潘美獨拔三州，遂違節制而失利於岐溝。此愛克厥威之過也。時趙昌言在魏，奏乞誅彬及昌言，自延安還，被劾不得入見。彬居樞府，爲請於上。彬之仁厚，皆此類也。周朝嘗使吳越，訖事卽行，不受私覲。吳越屢追遺之，彬曰：吾終拒之，是近名也。遂受而歸，盡輸內帑。世宗強還之，欲辭不獲，命悉以分親。

大○是○難○事○

舊而一介不取，居官俸入給宗族，無餘積。遇人雖甚微賤，莫不以禮待遇。朝士大夫必引車避之。真宗聞其疾，親視臨問，手爲和藥，及以計聞，惻然震悼。對輔臣語及彬，必流涕以遺恩。官其親族門下吏十餘人。子璨、瑋、孫儀。

曹璨字韜光，彬之長子，以蔭補供奉官，累擢至忠武軍節度使，殿前都指揮使，在禁衛十餘年。以疾除河陽節度使，加平章事，制入而卒。年七十，贈中書令。璨質厚寡言，父爲上將，璨常從行，彬以爲類已，特鍾愛。



之征討得與計議。太祖知之，特授宮苑副使。太宗朝，爲鎮定鈐轄，屢戰有功。諸將多欲追奔，璨曰：「戎人多變，力止之。」璨習韜略，好讀左氏春秋，善撫士卒，兼著威愛，居家以孝謹稱。雖輕財，不逮其父，而和厚亦有父風。

曹瑋，字寶臣，少爲父彬衙內都虞候，授供奉官、閣門祗候。李繼遷擾邊，諸將數出，皆無功。太宗問大臣誰可任者，彬在樞密言：「瑋可使。」召見，欲除諸司使，知渭州。彬固辭，止以本官同知渭州。時方十九歲。咸平二

年，彬薨，請服喪，不許。天禧四年，除宣徽北院使、鎮國軍節度留後、簽書樞密院事。丁謂惡其不附已，指爲寇準黨，出之。改南院使、環慶路都總管，兼安撫使。乾興元年，降左衛大將軍、觀察使。久之，復舊官。天聖七年，除彰武軍節度使、真定府路總管。卒，年五十八。贈侍中，謚武穆。瑋好讀書，通春秋，尤善左氏傳。爲將四十年，戰未嘗敗。衄威震西鄙，初自渭州移鎮戎軍，言鎮戎地平，便於騎戰，非中國之利。請自隴山而東，循古長城鑿塹，以爲限。又請以兵械及閒田蠲租以給



弓箭手再知渭州破章諲族於武延鹹泊川滅撥臧於平涼隴山諸族皆獻地瑋爲築堡山外號籠竿城募弓箭手守之知秦州兼涇原儀衛鎮戎安撫使宗哥立遵與唃廝羅謀內寇乃上書求號贊普瑋言不可聽若復有求益難制也朝廷猶授立遵節度使既而立遵令其舅賞樣丹說蕃部郭廝敦爲嚮導瑋遂以計使廝敦圖樣丹後旬日果攜其首至瑋表廝敦爲順州刺史先是張佐知秦州蕃部驚擾至是凡前拒王師者皆伏匿瑋令納馬贖罪而還故地至者數

千人廝敦因獻南市卽秦渭之咽喉也自百關至威

遠共置寨十數亭障橋梁相望浚壕塹四百旣而唃

廝羅以衆十萬人寇瑋逆於三都谷擊敗之斬獲萬

級踰年又破宗哥將馬波咤吒於野吳谷誅叛者鬼

畱族夷之於是河洮蘭三州安江妙敦邈川黨通等

羗皆破散宗哥所立文法納質內屬唃廝羅逃入磧

中塞垣遂安凡羗酋欲有所爲必先令其下謂之立

文法焉秦人請立碑紀瑋功有詔褒之天禧三年德

明寇慶州柔遠寨都巡檢楊承吉戰不利復命瑋爲



安撫使委乞骨咩大門等族聞其至歸附者千餘落  
 初繼遷死瑋言繼遷擅中國要害地終身抗拒今國  
 危子弱不即捕滅後強盛恐難復制朝廷欲以恩致  
 德明書寢不報自三都谷捷喃廝羅聞瑋名即以手  
 加額而東嚮之鎮天雄契丹使過必戒其下無敢疾  
 驅者在渭州或戍卒叛入夏州有告者瑋必曰吾使  
 之去勿問也繼遷聞即斬首投境上環慶邊人多市  
 屬羗之田致單弱不自給即沒虜中瑋令盡還之有  
 犯即徙其家於內地舊羗殺邊民以羊贖其死瑋下

○令○曰○羗○自○相○犯○從○其○俗○即○犯○邊○民○論○如○律○遂○無○犯○者○  
○稽○置○自○是○不○同○  
 始置弓箭手斥塞上棄地使相角力勝者給田二頃  
 再經秋成課市一馬馬必勝甲然後官為印之益賦  
 田五十畝至三百家以上團為一指揮築堡於要害  
 處使環之以塹又立馬社一馬斃衆為市馬塞下諸  
 塹皆以一丈五尺為濶廣之阻山險不可浚者止治  
 使哨絕而已其制屬羗百帳以上置軍主指揮使不  
 及百帳止置指揮使其蕃落將校止於本軍序進之  
 不從他軍以其熟虜情知出入路故也瑋所措置至



今不能改。子信倚，僅倩，慈聖光獻皇后，璨之女也。璨

之子曰儀。

湯云：據新編興言行錄，曹太后彬少子玳女也，非璨女彬七子長珣官至昭宣使，琮字實章，然則陶陶詩云：蒐兵四解降，王縛教子三登，上將壇亦第舉琮，琮言之耳。

曹儀字指臣，以祖蔭補右班殿直，累擢至耀州觀察使。卒年五十五，贈節度使。子詒，謁談，初儀知邠州，有告弓箭手都校李文展將叛者，朝廷命儀察之。文展習知蕃漢事，邊人多畏服。其後帥府以為腹心，季父瑋在邠，亦所委用。儀明其不反，益信任之。邊人莫不感悅。儀嘗以上軍都虞候為涇原副總管。景祐元年，皇后受冊，乃請解軍職而易廉車之任。

楊礪，京兆人。曾祖守為唐使相，乃宦者復恭之養子。礪建隆間登進士第。真宗在藩邸，嘗為記室，即位擢給事中，翰林學士。咸平元年，樞密副使。二年薨於位。年六十九，贈兵部尚書。礪周顯德中，初應舉，嘗夜夢見一人衣冠甚古，自稱徵君，謂礪曰：汝能從吾遊乎？礪隨往，頃之，覩宮衛嚴邃，俄升大殿，見一南面而坐者，徵君指之曰：此來和天尊。汝異日事之。礪再拜而退，及為記室，謁襄邸，還謂其子曰：今日見襄王，正昔所見來和天尊也。礪為文無師法，詔詰迂怪，見者哈



宋湜字持正京兆人父溫故終於補闕季父溫舒終於起居郎皆有時名湜少孤以孝聞太平興國二年登進士第累擢知制誥翰林學士咸平元年樞密副使從幸澶淵以疾薨於道年五十一贈吏部侍郎湜秀穎有器識好學善談論尤工筆札得者珍藏之善引重後進有文集二十卷

錢若水字淡成又字長卿河南人十歲能屬文華山陳搏一見以爲有仙風道骨雍熙中登進士第至道

初同知樞密院真宗卽位屢求解機務不允以親年高爲請益堅乃罷爲集賢院學士改鄧州觀察使判并州以疾召還卒年四十四贈戶部尚書若水風流儒雅有文學善議論事母以孝聞所至有譽望接物必以誠評人貴賤壽夭多驗自知不壽故懇辭勢位賢士大夫皆宗慕之有文集二十卷自翰林草詔賜趙保忠云不斬繼遷開狡兔之三穴潛歸光嗣持首鼠之兩端太宗湜嘉之知天雄軍詔遣決議城綏州率衆過河分布隊伍動有師律宿將見者莫不歎服



還言城之無益詔已之修太宗實錄初至道三年春  
太宗晏駕有馴犬號呼不食詔遣送陵寢叅知政事  
李至欲若水書其事遺之詩曰白麟朱鴈且勿書勸  
君書此懲浮俗若水不從至因若水奏成書不列監  
修官呂端名以爲若水掠美若水援唐故事有實錄  
不書監修官名者衆不能折嘗從幸大名詔御史中  
丞令訪近臣邊事若水言臣聞用兵以伐謀爲上御  
將以用法爲先比者傅潛爲帥擁衆十萬閉關縱寇  
坐看醜虜殘虐生民不正典刑曷懲其後楊延朗楊

嗣勇於赴敵奮不顧身授任尚輕見功未賞臣願陛  
下誅傅潛以徇衆擢朗嗣以勸能使諸將承風各思  
用命聲馳塞外威懾羣胡昔僞晉劉崇結契丹入寇  
懦將樊愛能何徽臨敵不戰周世宗陳宴而戮之因  
使偏將十數分擊太原崇不敢支戎亦遁去其後收  
淮甸下秦鳳平關南如席卷之易此用兵伐謀之効  
也欲消外侮必本安邊用得其人莫如太祖昇董遵  
誨以通遠軍郭進之在關南何繼筠之處鎮定隰州  
則李謙浦易州則賀惟忠王彥昇之治原姚內斌之



守慶名不過沿邊巡檢責其効皆十餘年濶略其細故則無畏避之心就錄其功賞則絕倖遷之意官卑故易以使久任故知虜情閒授睿謀戒其生事是以西寇北虜十七年閒遣使稱藩不爲外患已試之効今皆可行久之北虜未賓復內出手詔詢若水備禦翦滅之術若水言臣讀前史論匈奴者多矣若漢婁敬樊噲季布賈誼鼂錯主父偃徐樂王恢韓安國朱買臣董仲舒之所陳特和親征伐之二議唐李靖魏徵溫彥博郭正一狄仁傑之所及亦不過戰守之兩

端晉桑維翰不背約之言出於微弱故相趙普請回軍之奏姑冀息民悉非遠謀臣所不取嚴尤謂自古禦戎無上策臣竊笑之守在四夷制勝以靜非上策而何臣聞唐魏博一鎮爾戎兵固不衆於今日而虜騎未嘗南牧者以幽薊爲北門扼其險阻故也石晉割地之後由定武達滄海千里受敵雖設二關鎮之以重兵莫可以禦故晉末渡長河漢初復擾邊徼以周世宗之英武曾未能絕其寇中山窺上黨今御札詢備禦翦滅之術臣以爲未得幽州未可翦滅也後



唐莊宗在河北命周德威取幽州然後南向而爭天下蓋先爲萬全之計使不能勝此善用兵者也夫戰守不同心將不能料敵重兵在外輕兵在內則今之所患也臣願陛下選智謀可以任邊郡者聽召壯士以爲部曲而官爲廩給之又募民爲招收軍厚其糧賜蠲其租稅彼供輸兩地各有親屬則敵之動息得以知之如是同心將能料敵而在外者皆輕兵矣然無以統衆則不能用衆無以制勝則不能勝敵故必擇大臣領近鎮提重兵以專闡外之事有警則督戰

已事則班師既無舉兵之名又得馭兵之要三軍同力上下一心備禦之方舉積此矣若乃患民力之困則廣邊地之營田防戍卒之驕則嚴將帥之法令古語有之曰法不可疑令不可違又曰賞不勸謂之止善罰不懲謂之縱惡昔太祖用郭進守西山遣戍卒必戒之曰汝謹奉法我猶赦汝郭進殺汝矣其假借如此故郭進所至兵未嘗小衄臣願陛下推太祖所以待郭進之心而待諸將則法令不患不嚴勸懲不患不至上善其議

按若水所言切中當年情事議論極爽劃分明令人讀之心目豁然矣原本爲先爲字作當未賞賞字作大倖作幸



張宏字巨卿金州人太平興國二年登進士第歷官以勤幹聞雍熙三年除樞密副使四年與御史中丞趙昌言對易其任端拱初復樞密副使久之罷真宗卽位授工部尚書卒贈右僕射子可久可道可度宏淳謹少廉譽

夏侯嶠字峻極濟州人太平興國初登進士第真宗在藩邸爲翊善尹開封爲推官東宮建爲太子中舍卽位除給事中居數月擢樞密副使咸平元年罷爲戶部侍郎翰林侍讀學士兼祕書監卒年七十四贈

兵部尚書嶠慕道以養生爲務喜誦莊老書淳謹無過有文集十五卷

柴禹錫字玄圭大名人少有相者謂曰子甚貴若輔以經術必至將相由是頗讀書傳太宗尹京因委質焉卽位累擢如京使掌翰林同告秦王廷美陰謀擢宣徽北院使兼樞密副使雍熙初罷淳化四年復舊任兼知樞密院事除節度使卒年六十二贈太子太傅







書